


Kur Cholsam



Prabodh M. Sangma

KU·CHOLSAN



PRABODH M. SANGMA

Published by
Smt. Marvinia R. Marak,
Hawakhana Deficit Secondary School
P. O. Araimile
West Garo Hills, (MEGHALAYA)

First Edition 2004

Copy right reserved

Dam Gong 50/-

Printed at
Panthi Offset Printers,
Sukbir Bhawan, Tura.

AGANCHENGANI

A·chikrang badita chasong A·song Chigako gipinni jako gimaate iachi uachi re·jojoe brange katbrange dongna nangachim aro A·chikrangni jat chigni changiparangoni badiagipa jat da·o songdongenggipa A·chik songo songdongechengachim ba napechengachim uni gimin darangba kakket dake aganna ba mesokna manj·a. Indiba Achikrangni songdongachabaaniko ma·gitcham pagitchamrangni ku·riting aro daororo Achikrangni songdong achabaaniko niede, A·chikrang bilongen so·sojengjeng dake janggitangbagiparang ong·achim ine nikna man·a. A·chikrangni indake janggitangbaanio chanchie aro so·sojengjeng dake janggitangbaani bano maidake bon·chota uarangko am·aonian ia novel da·o nikenggipa bimangona sokaha. Novelo parakgipa pilak ‘character’- rangan chanchichipe banaigipasan ong·a. Badita chasong Zaminderrang A·chikrangko rokomari dake sinjetbaengachim aro ua sinjetanirang bano maidake bon·aha iarangko ia novelo chanchichipe seanisam ong·aia. A·chikrang gipinni nokkol itani aro chonik- onchepe jakkalani ka·ako (bitterness) ka·tongo dingchike ra·e Zaminderrang baksa dakgrikna ka·kim chabamitingo ‘East India comapny’ -ba on·tisa rengsi man·paeaha. Britishrang sokbakujaode A·chikrangni ka·tong wa·al chaani, Zaminderrangni kosako ka·kim chae jingjengatani bilongbegenchim. Indiba Britishrang

“GARO AFFAIRS”- o jak on·ani gimin aro A·chikrangko ka·sae jakkalani gimin Britishrangna A·chikrang bamaha, indakesa A·chikrang maidakgipa jatchim uko Zaminderrangna chu·gimik mesokna chol man·jaha. A·chikrangni kengija bamgija a·kawe jolrangchi re·ange sko sotarangko aro dakgrik dinggrikna ka·dongarangko Mughalrangba ma·siangachim. Haida Karaibari Zamindar baksa nanggrikanian A·chikrangni bon·kamgipa Zamindarrang baksa dal·e nanggrikani ong·akon ine chanchiman·a.

Anga dintangmancha angni skigipa Prof. Milton S. Sangmako mittelnä namnikbea, maina ua an·tangni sea·jotanisango choljokjeoba, jakchakjaoba aro mikron operation ka·e saae dongoba angni ia novelko jechakgijaan niataiaha. Uni gimin anga uko dintangmancha mittelaniko on·chengna namnikbea.

Poraisogiparang ia novelko porae namniksoode, angni neng·anirang indin ong·ramaijaha ine anga kusi ong·begen.

Poraisogipa sakantina angni mittelanichi

“Author”

AGANSAMSOANI

Jeo nang-ni gisik, unon nang-ni gam ong-a. Na-a mainaba gisik nangchongmotode aro uko gisik nange dakode, uan nang-ni aro jatni gam ong-a. Na-a ki-tap sena gisik nangani dongode aro gisik nangen seode, uan nang-ni aro jatni gam ong-a.

“KU-CHOLSAN” ine done Prabodh M. Sangma, ong-chongmotanggipa itihaso pangchake ia novelko seaha, ua Songsarni golpo gita ong-oba, ong-bebegipa obostao ga-chate seaha. Iako segipa A-chikrangni itihaskoba tala ine ia seaoniko ma-sina man-a, maina Britishni chasongona kingking batanggipa chasongrango A-chikrangni itihaso, Zamindarrang baksa kajia- golmal ong-an gapaiachim. Aro ian ong-a je, A-chikrang Karaibari Zamindarni onai ka-ako chakna man-jae 1815 bilsini January 9 tariko Karaibarini Zamindar Mahendra Narayan Choudharyni Rajbari ba nokko ritchani ritcha A-chikrang re-ange so-aha aro Mahendra Narayanni depante sa-chonko man-gope gimik sak sni manderangni skorangko sote ra-e a-brirangchi katangaha. Ia ong-a obostako Bengal Judicial Criminal, 1815, February 7 tarikni File No. 17- o, janapaha. Uni gimin ia Novel historical Novel ong-a ine aganna man-gen. Ia ong-chongmotgipa obostao pangchake, gipin gipin Novelo janapgipa manderangni bimingrangko an-tangan done,

golpoko banaiatjole ia Novelko seaha. Ian nambegipa Novel ba jatni Songsarni golpo ong·aha ine anga nika.

Angni ka·dongani gita, iako porae, Novelni su·uanikosanmangmang poraigiparang cha·tote nikjawa indiba A·chikrangni itihase aro A·chik jatni gitche bewalrangkoba ia Noveloniko nikatna man·gen. Nangrimgrike dongani namgnikoba iano nikna man·gen. Ian authorni gam donanggipa jatni gam ong·a.

Dated Tura,
the 29th May, 2004

Prof. Milton S. Sangma
(Rtd) Pro- Vice Chancellor
Tura.

Ku·cholsan

Prabodh M. Sangma

Mikkangchi chapa ka-atnagipa authorni gipin ki-taprang.

1. Nanggorere Goserong (Novel)
2. Kurambal (Novel)
3. Sing-teka (Novel)
4. Gronggrika (Novel)
5. Gapchilekni Bikrok (Novel)
6. Ang' Gisiko Nangdika (Short Stories)

SA

Bilakgiparang pangnan bilgrini kosako rokomari sinjetarangko on-ronga. Ong-telaigipani niaman haida indakenkon. Do-rengrang bilgrigipa do-orangko sape cha-ronga. Matcha, peru aro singhorangba bilgrigipa matchok, marakka, sapau, matchu, matma aro do-bokrangko chike cha-ronga. Bilgrini kosako bilakgiparangni sason ka-anian ia a-gilsakni niam. Bilgrirang pangnan kene, an-tangko donuesa janggitangna nangao ga-aka. Bengblokrang maming saloba chipuko warachakna amja. Uandaken matchok, marakka aro sapaurangba matcha aro singhorangko warachakna amja. Uarang katnasan atchia "born to run". Isolba haida indake katnan uarangko tariaha.

Mande jatoba apsan obostarangan chengo chengonin ong-baenga. Bilakgipa jat bilgrigipa jatni kosako sason ka-ronga aro nokkol dake jakkalbaronga. Bilgriani gimin Israelrangko Egeyptang 400 bils nokkol dake jakkalaniko darangan Old Testamentoniko nikna ba poraina man-a. Indiaoba Brahminrang jeko chongipa jatrang ine gadang taria, uamangko namen onchepe, chonike aro nokkol dake jakkalachim. Sasonni bidingoba bilakgipa jatrangsa bilgrigiparangni kosako sason ka-rongachim. Bilgrigiparang chakchikna amadipet bilakgiparangni ning-o chakchiken dongronga. Chakchikna amteljaode uamang dakgrikronga aro dakgrikeba amjaode ua biapko watean gipinchi gital biap am-e katrongaia.

A·chik, Rabha, Koch, Boro, Hajong, Banai, iamang an·tangtangni a·song goreko bilakgipa jatni jako gimaate katbrange gital a·song namako am·e, chiga ringtoa biapko sandie a·brirangni burinrangona napeaha. Uamang burinrangko o·sape rongtalate ari wena biaprangkoba namen tariaha. Mi ge·e bagan bari tarie uamang melie nangrime dongengachim. Maniani bidingoba uamang an·tangtangni manianiko kusi ong·en maniengachim. Gipinni ning·o nokkol gita dongana bate okumu chakeba jakgitel ong·e dongan mandeni gisikna namen sukni ong·chongmota. Indaken uamang baditaba chasongrangde dongengachim.

Changsao Hogra Rabha baksa Upendra Hajongni a·ani simako ra·e bilongen jegrikani ong·aha. Sakgnini a·an maming ‘patta’ dongjachim, ‘khas land’ sachim. Indiba sakgnian saksa sakgipinko a·ako ra·sekenga ine dosigrikaha. Kajia bilongen dal·angaha. Sakgnian saksa sakgipinna bamgrikjaha. Ari wena am·oba darangba darangna on·jaha. Uamang dakgriknan dolgni dake a·baona re·basrangaha.

: Na·songni domkiana angni kni dingsaba mosrangja. Nangode anga an·chi on·gen indiba a·ako on·tisaba on·jawa. Hogra rakbee inataha.

: Nanggita dakgipa achak Hograna angko kenagita nikengama? Bipa ong·ode chabae nibo sala achak- ine Upendra Hajongba Hograko rabiataha.

: Hogra sawamancha uko da·al ma·siangbo indide- ine Hogra ka·onanga amchakjae chaangsrangaha.

Re·angarian ua Upendrani gittokko rim·gekgekeaha aro Upendrabha Hograni natengo rake satkapsoaha. Uni ja·man sakgnian a·o romromtoksrangaha. Uamangni indake sakgni dakgrike romrome dongmitingon Hogra aro Upenni dolrangba chabae dolgnian gol·dik aro je

jerangko jako man-a ra-bildange dakgriksrangaha. Saoba saobarangde be-eno, mikkangrango an-chirara ong-pilaha. Dolgnini pil-tak pil-tak dakgrikmitingo Changsan Sangma ua biapona re-bae uamangko dakgrikjachina rake beng-aha. Ua Hogra aro Upenni jatchiona re-ange uamangko dingtanggrikatna jotton ka-mitingon Changsanni skoo aro be-eno saoba saobarangni dokatarang bilongen nangeaha. Changsan rang-san a-o gitilgopaha. "Uh! na-song angkoba dokaijokma Hogra- Upen. Ai-a, angade amjajok" ine Changsan ma-amjolaha. Changsanni obstako nike uamang pilakan jajrengtokaha aro kentokaha. Uamang dakgrikako dontonge pilakan Changsanni sambaonasa re-batokaha. Changsanni sko aro be-enrangba an-chi chripchrip ong-pilachim. Changsanni indaka obstako nike Hogra tarake re-anggalgale chi ra-bachina gita jonggipako ge-etaha. Ramdangni chi ra-baa ja-man uamang Changsanni skooni an-chirangko su-srangaha aro matgipa biaprango samko kagope on-aha. Changsan aditade sam nongani ja-man an-sengkal-aha. Unon mitam manderangko ua Upendrako nichina ge-etaha. Upendrade Hograni jako bang-kalen doka man-aha. Maina, Hograra pante aro Upendrara budepachim. Upende a-oan gitilgope dongengachim. Upenkoba uamang jinmaan uni be-en aro skoni an-chirangko su-srange matarango sam kagope donaha. On-tisa mikselbaani ja-man Upen Changsan Sangmao kema bi-aha. Ua indake inaha- "Jong Changsan, dikdiksani gisepo chinga taning gri ong-e ka-onangachi kana (mikgri) ong-atako man-e dakgrikbeaha. Chingni dakgrikmitingo re-bae na-aba indinari rengsi man-paaha. Chingni u-igijaniko na-a chingko kema ka-bo, maina, chinga u-ichongmotja".

Changsan Sangma ua jolonide saksa skia man-gipa, nambegipa aro 'court' ba kacharirangchi re-dil-

dodilgipa ku-mangipa mande ong-achim. Biko A-chik, Rabha, Hajong, Koch, Dalu, Banai, Kachari aro pilak jatan manibeachim aro mande ra-beachim.

Hogra Rabhaba Changsano re-bae kema bi-aha. Unon Changsan "na-song pilakkon anga kema ka-aha, indiba indaka kaja mikkangchi ong-taijachina. An-ching pilakan melie nangrime janggitangna nanggen. An-ching melie nangrime janggitangjaode, dongjaode an-chingna bate bilakgipa aro budi changbatgipa jatrang an-chingko onchepe chonike jakkalgen. Uni gimin pilakan ku-mong nangrime dongna nangchongmota. An-ching an-tangtangan meligrikna nangrimgrikna man-jaode, ua an-chingni meligrikna nangrimgrikna man-gijani jatchio napseke bilakgipa aro budi gnanggipa jatrang an-chingko rokomari cholrangko ra-e mikchepe onchepe jakkalna jotton ka-gen. Uni gimin an-ching tribalrang pangnan mikrake aro simsake ku-mong nangrime janggitangna jotton ka-angna nanga. Ong-jaode, chengo ambi atchurang jegita A-king mirimko simsakbajani gimin gimaatbaaha, uandake da-o an-ching ku-mong nangrime dongjaode chengo ambi atchuni branga gitan brangtaina nanggen. Uni gimin an-ching chengo ambi atchuni branga gitan brangtaina nanggen. Uni gimin an-ching da-o je biapo dongengaha, ia biapon tom-tom nangrime ku-cholsan ong-e dongode maming bobilba an-chingko il-lengatna man-jawa. Pangnan simsake dongbo, melie nangrime janggitangangbo" ine Changsan pilaknan ku-pattiataha aro knal pringo uni nokona chanchina nanggnirangko chanchina re-batokchina aganattokaha.

GNI

Salgipino A·chik, Rabha, Koch, Hajong, Banai aro Kachari pilakan Changsan Sangmani aganata gitan uni noko timolbatokaha. Mitamde Changsanni mejalo Upen aro Hogramangni dakgrikmitingo champengna re·ange doka man·pae mata·bua man·gipa namama namkuja uko nina manchaan sokbatokaha. Bang·batan Changsanni kajiako champengna re·ange indinari mata·bua man·paani gimin duk ong·beaha aro gisiko suk ong·tokjaha. Hogra aro Upenba Changsanni sambaona re·bae da·oba changsa kema bi·taiaha.

: Anga namengahaba. Na·simang angni gimin jajrengnabe aro duk man·nabe. Darangba namgijako dakgen ine mamingko dakna man·ja. Iarang pilakan Isolni skachisa ong·ronga. Anga saknaa man·ani giminsa na·simangni kajia, jegrika aro dakgrikaba dontongna nangaha. Ong·jaode na·simangni gisepo saoba saobarangnide janggian gimagenchim. Indiba Isolan indake namgija a·sel sokarangoni na·simang pilakkon jokataha. Uni gimin Isolosa bi·bo.

Changsanni kattarangko knae bang·batan sko denggokjolaha. Maina, uamang pilakan an·tangtangni gualanirangko ma·sina man·tokachim. Uamang saksa sakgipinchiko nigrike kratcha·griktokaha. Changsan da·oba timolbagipa manderangchipakko niate indake aganangkuaha -

: Na-simang a-a mangmangko ra-e indake kajia ka-na nangjachim. A-a darangniba ong-ja. A-ako ra-e darangba siangra amja. A-ako ra-e jegrikani giminan Mahabharata-o Kauraba aro Pandavamangni gisepo dal-bea dakgrikani ong-achim. Ua dakgrikanio darangniba namgni aro lap ong-jaha. Ia a-gilsakni bagan- bari, nokjam, gamjin aro 'angni nang-ni' inarang pilakan jumanggita tol-asa aro togianisa ong-a. Chong-mot kattarangde indake ong-ja. Haida na-simang ja-mansa ma-sinaba donga ba ma-sigen. Je a-ani gimin da-asal na-simang jegrikaha aro dakgrikaha, ua a-aon changsade pilakan ma-kapgen, sina nanggen, indiba a-ade apsan ong-en dongaigen. Je bimangni gimin indakpile simsakenga, ua nitogipa bimang changsaode gopramosa ong-aigen. Uni gimin maming saloba indinari kajia ka-na nangja. Man-na nanggniko man-gija, am-gijagipako man-e mai kusi ong-gen? An-chingna da-o nangnikbegipaan biap ba a-dam ong-a. Ia biap a-damkon an-ching da-oba an-tangni ina bil man-kujaenga, Zamindarni ning-osa kajina on-e dongna nangenga, uamangni sinjeta, chonika, mikcheparangko chakchikna nangenga. An-ching jeko an-tangni ine ka-donge, bilgnang aganna man-ja, ua biap ba a-ani giminan da-al an-ching jegrikaha aro dakgrikaha. A-gilsako jakgitel ong-e janggitangna an-chingna biap nanga, jakgitel biap, ua biapo Zamindarrangba an-chingko sinjetna man-jawa. An-chingna nanga jakgitel a-song, je a-songo an-ching kusi ong-e janggitangna man-gen. Indakgipa a-songko man-asa an-ching ku-cholsan ong-na nanga. Ku-cholsan ong-ani bite namen chi-a. Songsaro chu-sokaniko man-ade ka-onanga bika soaniko galna nanggen. Na-simang mikkangchi ku-mong nangrime dongangna simsakangbo. Basako mai sinjetanirang sokgen darangba u-isoja. Uni gimin pangnan mikrake dongbo. An-chingni ambi

atchurang ba pagitchamrangba rasong mikkim gnange, raja ong-e a-songko goreko sason ka-baachim. Pagitchamrang simsakbajani gimin a-song goreko, chiga a-piljangsaniko gimaate an-chingko brangate donangaha. Je biapo dongoba bilakgipa aro chalakigipa jatrangan onchepe chonike jakkalani giminsa chaktojae an-ching da-o an-chingni dongenggipa biapo dongenga. An-ching da-o an-tangtangan meligrikjaode, nangrimjaode, gipinni chonika mikchepako warachaksona gita maming bil man-jawa. Uni gimin pangnan mikrake dongbo, ku-cholsan nangrime cholibo. Basako mai a-sel sokbagen uko darangba ma-sisoja.

Changsanni timolbagipa manderangna indake aganmitingon, Maireng Koch uanona re-bae jinmani mikkango uni knabagimin kattarangko indake aganeaha -

: Angni mande ra-na krabegipa Changsan babu aro ia tom-anio sokbatokgipa angni ma-gipa pagipa, jongada, noabirang, chong-motan, angni ia tom-aona re-bamintingo anga ramao Zamindar Choudhuryndi mande saksa baksa grongbaaha. Ua mande angna indake aganangaha je, an-chingni a-arangkode Zamindar Choudhury an-tangni bimingo 'patta' ka-e ra-tokaha aro Choudhury Saheb an-ching pilakkon uko knal grongchina aganatenga ineba ua angna aganangaha. Angade uni kattako knae bebera-na man-jaha aro mamingkon chanchina changpiljaha.

Changsann Mairengni kattako knae aiao inmanoba Zamindarni denggu budikode ua jechakna man-jaha. Kattara tol-ama kakketma uko u-ina ske knalan Zamindarko jinma grongna re-anggen ine tik ka-e donaha.

Unon Gaureswar Banaiba asongaoni chakateming uaba Mairengni knabaa gitan Choudhuryndi mandechiko knabaaha ine jinmana parakataha.

Changsan manderangni kattarangko knagope chanchie da·oba ua indake agana a·bachengaha. Ua indake agane manderangni gisiko so·sojengjeng ong·aniko tom·tomatna jotton ka·aha.

: Maireng aro Gaureswarni knabagipa kattarang maming aiao inmanani katta ong·ja. Ian man·e cha·giparangni gisikni cholon bewal ong·a. Dal·gipa aro man·e cha·gipa manderangni bewalan indake ong·ronga. Bilgrigipa aro kangalranganiko ra·sekjaode, togijaode maming saloba man·e cha·gipa dange rogipa ong·na man·ja. Jeba ong·bo, an·ching skangan kobor man·soani gimin namen namaha. Indiba an·ching da·o maidako namgen uarangkosa chanchisona nanggen.

: Maiko chanchisogen Changsan babu. Zamindar Choudhury budi dake an·chingni a·arangko sriksrik 'patta' ka·e ra·tokahaode uni ning·o retrang ong·e dongana agre an·ching maiko dakna man·gen. Zamindarni mikkangode an·chingde chi·brim gitanan ong·aia. Je a·arangko kosto dake o·sape, rongtalate, chasong chasong game cha·baeba an·ching an·tangni ine 'patta' ka·nan man·kujaengachim, ua a·arangni giminan jegrike dakgrike an·tangtangsang an·chi pari ong·e ra·tokaha. Indinarian na·aba jawani jegrik- dakgrikako champengna re·angen mejalo mata·bu·ako man·e obosta ong·e ra·jok. Ia pilakrangko nigope angade Zamindar baksa warachakanikon maming cholkon nikatjaengaha. Maina, an·chingni gisepon melie nangrime janggitangna skani gisikan dongsrangja. An·tangni chonbea man·gnini giminan saksa sakgipinko mikbuode, jegriknasan dakaiode, maming melinangrimani dongjaode, chengo pagitchamrang jegita brangna nangachim, ua apsan obostarangan da·o an·chingni chasongoba ong·baenga, ine budepa Dahar Boroba aganpaaha.

Hogra Rabha aro Upendra Hajongde Dahar
Boroni agangipa kattarangko knae namen kratcha·aha.
Maina, uamang sakgnian mejalo dakgrikachim aro
uamangni dakgrikako champengna re·angen Changsan
Sangmaba doka man·paachim. Hogra chakate indake
inaha -

: Mejalo je ong·na nanga ua ong·angman·aha.
Uni gimin anga namen kratcha·aha aro gisikoba duk
man·beaha. Indiba Zamindari kamni gimin da·o jerangko
knaaha, indake maming saloba Zamindari skako
chu·sokatna on·jawa. Nangode a·ani gimin an·chi
on·gen, indiba Zamindari a·ako wate on·chongmotjawa.
Zamindarba ong·china jeba ong·china, indakpile an·tangko
nom·ate bamede a·gilsako janggitangna man·jawa. Hograni
raka raka kattako knae Changsan indake inaha -

: Bilchide songsaro maming kamko chu·sokatna
amja da·ode jeko jako ra·naba ba daknaba an·tangni
nama taningko jakkalna mann·a nanga. Na·simangni ka·a
ding·ana, ka·dongana namen kusi ong·chaka. Indiba ka·a
ding·aniko aro ka·donganiko jakkalna changna nanggen.
Ka·onangana bika soana ka·dongdugae jebaisi uko
chu·sokataride maming nama biteko man·jawa. Uarangko
jakkalna an·ching pilakan melie nangrime ku·cholsan
ong·esa kamko ka·na nanggen. "*United we stand, divided
we fall*" ine English ku·sikchi mingsa aganme·apao
aganani donga. Jinma nangrimode chibimakoba gipin biap
gita jokatna ama. Uandake an·ching pilak nangrimode
Zamindar mai, a·brikoba su·pongna amgen ba man·gen.
Da·o an·chingni gisepe nangrimanian nangchongmotgipa
ong·enga. An·ching nangrimna nangchongmotgen.
Ong·jaode an·chingni nangrimgijarangko nike
bilakgiparang ba Zamindar an·chingni kosako sinjetna
dingtang dake chol ra·gen. Chengode an·ching

apsananchim, da·oba apsan ong·na nanggen. Unode an·chingko darangba mamingko dakna pa·jawa aro man·jawa.

U·igipa ma·sigiparangni agananiko knaode aro historyrangko porae niode, A·chik, Rabha, Koch, Hajong aro Bororang 'Bodo' ma·kringonisa ong·bagiparang ong·a. An·chingni pagitcham ma·gitchamrangde apsananchim. 'Bodo' ma·kringni jelbra jelsua gita Salgro- Salaram jolode maming jatan dongja ba dongjachim. An·ching bilak wa·sagipa ma·kringni derutchu su·rutchurang ong·chongmotachim. Da·oba A·chik, Rabha, Koch, Hajong, Boro aro Banairang apsan nangrimode, Indiani North- East jolo an·chingan jelbatgipa ba majority ong·aikugen. Indiba an·ching da·o an·tangtangko dingtang dingtang dake chanchiani giminsa, nangrimna man·jani a·selsa, pagitchamrangni ma·ambirangko porae ma·sie ra·jani giminsa, an·tangtangni ma·kringskakon u·ina ma·sina neng·engaha. An·ching ia Zamindari an·chingni kosako sinjetbaengako warachaksonade ku·mong nangrimna nanggen, krimkro ku·cholsan ong·sona nangchongmotgen. Chingade A·chik, Rabha, Koch, Hajong, Banai aro Boro Kacharisa ine an·tangtangko dingtang dake chanchianiko galna aro gelna nanggen. 'Bodo' ma·kringni manderang namen bilak wa·sagipa aro ka·donggiparang ong·chongmota, indiba nangrima aro simsakanirang dongjani giminsa an·tangtangni rasong mikkimrangko gipinni jako gimaatna nangaha ine nikna man·a. Uni gimin an·ching da·asal dipet an·tangtangni bebera·anio, manianio, cholon bewalrango dingtanggrikaniko gualo ku·cholsan ong·e nangrimna aro je a·sel sokbaoba apsan krimkro warachaksona hai ine Changsan Sangma aganaha.

Changsanni agangipa kattarangko knae pilakan kusi ong-tokaha aro jakpa doktokaha. Knal Zamindarni okamatani gimin Zamindarni nokona re-angnaba tik ka-tokaha. Changsanba re-anggen inon Dahar Boro “na-ade indake saknaako ra-e maidake re-pagen, amjaode na-a re-pajaoba choligen” ine inaha. Unon Maireng Koch “ada Changsande jegitaba re-angnan nanggen, ong-jaode an-ching Zamindar baksade kajiasan ong-aigen, indiba maming nama chanchiaona sokna man-jawa”. {

Changsan kosto ong-omangba re-anggen ine ku-rachakaha. Saliangani gimin uni salode pilakan noktangtangchi re-bildangangtokaha.

GITTAM

Zamindar Bhabesh Choudhury ni a-tila. Gadang gittam nok. Nokmikkango silsila pulrang balga oe balchome dongtokenga. Zamindarni noknaan krakra. A-tilaoba chonchongipa samsirangko ge-e silbee tarie dona. Nokni barandaon Choudhury aro uni ripenggipa Gulsan Azizba asonge maibarangko golpoe dongsoenga. Gulsan Aziz saksa ia joloni namen mingsinggipa Ukil ong-a. Biko namanaba mingsinga aro namgijanaba mingsingronga. Ua Zamindar Bhabesh Choudhury baksa namen nama ripengchim. Poraimiting somoionin uamang sakgnian bilongen melibeachim aro apsan klass matechim. Jeko daknaba Choudhury Saheb ripengtang Gulsan Azizni ku-pattia gita ba uo sing-esa dakronga. Game cha-giparangni a-ako sriksrik patta dake ra-naba Choudhury, ripengtang Gulsan Azizon ku-mongchengachim.

Zamindar Bhabesh Choudhury ni aro Gulsan Azizni chanchiarang namen dingtang. Uamang A-chik, Rabha, Koch, Hajong aro Kacharirangko ia biaponiko rikgalna sriksrik budi dakaha. Ia biapo dongenggipa tribalrangko, chongmotan A-chik, Rabha, Koch, Hajong aro Kacharirangko rikgalna man-ode uamangni biapo non-tribal banggalrangko asongatskae "*GREATER KARAI BARI STATE*" dakna jumangko nikengachim.

Sriksrik a-a pattakode uamang dake ra-tokaha. Da-ode ua biapo donggipa manderangko rokomari sinjetachi rikgalnasa uamang ripeng sakgni budi dakengachim.

Unon Changsan Sangma, Hogra, Upen, Maireng aro Dahar Boromang an-tangtangni manderangko timolbae Zamindar Bhabesh Choudhury a-tilaona sokbatokaha. Sokbagipa pilak manderangko Choudhury Saheb samsirangni kosakon jebaisi asongchina aganaha aro an-tangba nok barandaoni ong-katbae a-tilani samsi kosakon Changsanmang baksa asongpaeaha.

: Mejalo angan na-simangko angona re-bachina aganatachim. Haida na-simang bang-a kattarangkon ma-sija aro anga na-simangna maming kattarangko ma-siatgija dona sikja. Ua kattarangko na-simangna agangen inean anga na-simangko da-al angni nokona okamataha. Na-simang re-batokahani gimin anga namen kusi ong-a. Na-simang ari wea, mi ge-arangde matchottokaha ine anga ka-donga. Matchotkujaoba haida bang-jaha. Choudhury inaha.

: Mi sika ge-arangde bang-batan matchottokaha Saheb, indiba noksa nokgnirangnisan bighasa bighagnimang bangki dongkuenga. Haida re-bagipa an-tirangon uamangba matchottokaigrok. Dahar Boro ka-sroke aganaha.

: Na-simang mi ge-tokman-aha, ia namen kusini katta, indiba ariwena, mi ge-na skang na-simang angosing-chengna nangachim- ine Zaminar Bhabesh Choudhury aganaha.

: Nang-ni kattarangko chingade ma-sina man-jaengaha Saheb. Chingna name tale agano nambatgen, maini gimin nang-o sing-chengna nangachim ine Maireng Koch sing-skataha.

: Na-simangni ari wee mi ge-gipa biaprang angni patta gnanggipa a-arangsa ong-a. Uni gimin angni a-o maiko ge-a ge-ja uko angasa agangenchim. Na-simang anggo sing-gija am-gija ari weaha aro mi ge-aha, ia na-simangni nama kamde ong-jaha. Jeba ong-bo, ge-mangimin a-aniko na-simang angna miko adi on-genma maiko dakgen. Mitamrangde bighaprako maun gittamrang dake on-ronga. Na-simang da-o angna mai hisape on-gen uko na-simangan bondobost ka-bo, ong-jaode angni patta a-ako anga darangnaba indinari cha-na on-na man-jawa. Iarangko aganasa anga na-simangko okamataha ine Zamindar Choudhury aganaha.

: Chingni ambi atchurang, ma-gipa pagiparang ia biapon sikapangaha. Badita chasong chinga ia biapon dongengaha. Ian chingni atchiram biap ong-a; chingasa a-ani pattako man-a nangachim. Indiba na-a sriksrik maidake chingni a-arangkosa patta dake ra-jok Saheb, angade mamingkon ma-sina man-jaha. Duk ong-bee Upendra Hajong inaha.

: Na-simang baksa anga bang-e kattarangko agane somoi nosto ka-na sikja, angni kattako maniode dongbo, manijaode na-simang angni patta gnanggipa a-oni gipinchi katangbo. Anga angni kattako manigipa manderangko ia biapona rimbagen. Na-simanggita jara burbok manderang baksade angni maming namgnian ong-jawa, uni gimin na-simang ia angni patta a-oni katbo, Zamindar Choudhury inaha.

Changsan Sangma Zamindar Choudhury ni kattarangko knatime jrip dongengachim. Ua gisikode bilongen sukjaengachim. Ua ma-sina man-aha je, tangkani bilchi Zamindar Choudhury srik tribalangni a-arangko patta dake an-tangni bimingo ra-gataha aro ua da-ode tom-tome janggitangenggipa tribalangko nokkol dakna ong-jaoba ia biaponiko rikgalna budi dakengaha.

Changsan chakchikna amjaha. Ua Zamindar Choudhuryko indake inataha -

: Chingo nang-gita dake tangka paisa dongja, bida budiba chu-ongja, indiba chingo kakketani aro ka-dongani donga. Na-a nang-ni kamko ka-angbo, chingaba chingni ka-na nanggni kamko ka-anggen. Nigen, na-a chingko maidake ia biaponiko rikgala. Chingaba ramram indinaride ka-pong gita watgale on-jawa.

Changsan Sangma jinmachiko niate indake inaha -

: Ka-sara ripengrang! na-simang iano timolbatokgipa pilakan Zamindar Choudhuryni cholete budi dake an-chingni a-arangko patta dake ra-ani gimin u-itokna man-aha, da-o na-simang Zamindarni katta gitan manie choligenma, jakgitel ong-e darangni nokkol ong-gija janggitangna skenga. Zamindarni katta gita choliode an-ching pilakan uni nokkolsa ong-na nanggen. Pagitchamrangni A-kingko goreko budichi chalaki dake pilakkon ra-sektokengaha. An-chingni a-arangko pilakkon ua an-tang bimingo patta dake ra-tokaha. Na-simang da-o wate on-aigenma, kakket bichalko am-gen. Pilakan name chanchie ma-rokesa aganchimbo.

Unon Zamindar Choudhuryni a-tilao sokbatokgipa pilakan ku-cholsan ong-e ku-monge indake intokaha -

: Chinga a-ani gimin an-chi on-gen, janggi sipilaigen, indiba a-ako indinari wate on-jawa. Pagitchamrangni a-songko, chigako iarangan togie, cholete, maiba budirangko dake ra-sektokachim, brangatachim. Indiba chinga da-ode brangna sikjaha. Nangode an-chi on-gen, a-ani gimin sipilaonan dakgrikanggen.

Changsan jinmani ku-cholsan kattarangko knae gisiko namen kusi ong-aha. Ua jinmako indake inaha "indide ia Zamindarni a-tilao an-ching dikdiksanaba

dongna nangjaha, hai, chakattokbo, an·chingba an·tangtangni kamko ka·na nanggnok”.

Pilakan krimkro chakate Zamindarni a·tilaoni chakatbildangangaha.

Choudhury Changsanko ka·onangbee mikgitching niataha aro indake inaha -

: Changsan, na·a mai jara dake katta aganenga. Angni mikkango name simsakesa katta aganbo. Na·a Bhabesh Choudhuryko ma·sikujaenga. Na·a changsao angko name ma·sina nanggen.

: Anga chingni Zamindarko skangonin namen ma·sia, indiba uni ka·tong ning·o nape dongenggipa Bhabesh choudhurykosa u·ikujachim. Indiba da·al angni rasong kopal nama, maina, Bhabesh Choudhury an·tangan angni mikkango chadenge katta aganengaha. Uni gimin uko u·ina angni maming bangki dongjaha.

Changsanni kattarangko knae Choudhury bilongen ka·onangaha. Ua asongaoni chakate Changsanchiko jaksi otate “shut up” na·a angni mikkango maming kattako agannabea”. Choudhury gisik sukjae inaha.

Ua somoimitingon Zamindarni demechikgipa, Miss Anjalee, pagipako sandie ua biapona re·badikaha. Ripengtangni “*birth day*” chi re·angna ine ua pagipako drae rimangaiaha. Anjaleeni ma·gipade uni chonon siahachim. Anjalee Zamindar Choudhuryni saksakamkam demechik ong·a.

Changsang, Hogra, Maireng, Dahar aro gipinrang Zamindarni re·angani ja·man uamangba noktangtangchi re·angtokaha.

Anjalee, Zamindar Bhabesh Choudhury ni saksakamkam demechik ong-a. Ua uamangni noko dongenggipa chakkolko da-al bilongen dokbeaha. Pringon ua uni ba-rarangko dhobichiko ra-bae donsochina ua chakkolko aganangachim, maina ua attamchipak badiaba 'meeting' chi ua ba-rako gane re-angna nangachim. Ua chakkolni bimingko Jiten mingachim. Jiten salo ba-rarangko ra-aigen ine chanchioba, chikking bajina skangonin bilonge sagitike ua dhobichiko Anjaleeni ba-rarangko ra-ena man-jaha. Meetingchi gane re-angna ba-ra am-e man-jae Anjalee namen ka-onangaha aro Jitenko ka-onanga amchakjae dokbeaha aro nokoniko rikgalatjolaha. Ua Jitenko katta manigijagipa denggu bi-sa ine manengaha. Jitenni maming aganchakanikoba ua knachakjaha. Ua Jitenko gitoko sikdokdoke nokoniko a-rikataha. Saani gimin ua ba-rako ra-ena man-jaha inoba Anjalee Jitenko bebera-jaha aro uni maming kattako knackakjaha. Jiten saani gimin be-en dil-dilenga, uchi Anjalee ara ka-onange dil-dilenga. Ua ba-ra gitalko ganesa meetingchi re-angna skachim. Indiba ba-rako ra-bakujani gimin ua namen ka-onangaha. Ka-onange ua Jitenko nokoniko rikgalataha. Jiten grapjoljole nokoni ong-katangaha aro adita re-angarian ua ramaon asonggopaiaha, ua unoni chakatangna man-jaha.

Tik ua somoion Changsan Sangmaba ua rama gitan bachiniba re-baengachim. Ua Jitenni ramao tugope dongako nike maimancha ong-a sambachi re-ange indake sing-aha.

: Ei bi-sa, na-a sawa? Maina ramao indake tugope dongenga? Nang-ni bimingko mai minga? Changsan Jitenni jako rim-e salchaaha.

: Anga saaenga dada. Anga Zamindarni noko chakkol dongengachim. Zamindarni demechik angko doke rikgalataha. Uh ! angade sin-beengjok. Jiten sin-beani gimin til-tilengaha. Uni be-enoba 'high temperature' ong-engachim.

Changsan an-tangni chadorko Jitenna chinataha. Jiten chadorko ra-e chinaha. Ua grapengachim. Changsan dikdiksa chanchia gita donge indake inaha -

: Jiten, nangko anga nang-ni nokgipani nokchi dilange donegen, hai re-bo. Na-a noko tom-tom tusie dongna man-gen. Unon Jiten rang-san indake jechakjolaha.

: Anga uamangni nokchi re-angtaijawaha dada. Angko uamangni nokchi rimangtainabea. Nangode anga nang-mingsa re-angpagen. Ua indake agane grapaha.

: Nang-ko dokomangba uamang nang-ko rakkitaiaigen. Na-a grapnabea hai ang baksa re-bo.

Jakko chopjolphile Jiten uamangni nokchide re-angtaijawaha ine Changsan Sangmao mol-molstapaha. Bon-kamao ua Changsanni ja-ako rim-e olakkipilaha. Changsan Jitenko noktangchi rimangna on-tisa jajaachim. Maina, Zamindar aro demechikgipa, Jitenko Changsan rope chopesa rimsrukanga ine bodnam ka-na kena. Ua saa namjokode Jitenko nokgipachin rimange donegen ine

chanchie rikshaw bolsako okamate Jitenko no gate
noktangchian rimangaiaha.

Anjaleeba Jitenko doke rikgalatani ja-man gisiko
dongsiksakbee Jitenko rimangtaina ine a-palo ong-kate
niatoa, ua saoba saksa pante Jitenko rikshaw-o gate
rimangakosa nikrikaiaha. Ua panteko Anjalee namen
ma-sia, indiba uni bimingkosa u-ija. Ua ua pantean
Jitenko rikshaw-o gate rimsrukangaha ine pagipana
agangen ine chanchie donaha.

Wal chetmang bajio Zamindar re-bae gariko
garrage-o napate Jitenko 'torch light' ra-bachina
okamataha. Unon Anjalee pagipani ku-rangko knae tarake
an-tangsa 'torch light' ko pagipana ra-angaha. Pagipa
Jitenni gimin sing-oa; "minisalo nang-ming jegrikanggipa
pante Jitenko rikshaw- o gate rimsrukangaha, ua
an-tangan mikrontangchi nikrikaha" ine pagipana aganaha.
Ua panteko Zamindar Saheb namen ma-sia ine
demechikgipana aganskaaha. Ua pante Changsan
ong-na nanga ine Zamindar demechikgipana aganaha.
Changsan saksa denggugipa pante ong-a. Zamindar
Bhabesh Choudhury Changsanko bilongen ka-onangaha.
Ia 'stupid, pantean an-chingni je kamoba champengenga.
Uko ua nama skianiko on-gen ine ka-onange aganaha.
Walmangmangko tusie pringon demechiktangko rime gari
start ka-e Changsanni nokko uamang paningsa
sandiagaha.

Changsan Jitenko hospitalchi rimange 'check up'
ka-baaha aro doctorni agana gitan Jitenna sam bolko
on-e sanengaha. Jitenko doctor antignirang neng-take
dongchina aganataha. Jiten banoni aro uni sawarang
donga uarangko Jitenni sambao asonge Changsan
sing-engachim. Unomitingon Changsan saobani gari
gam-baako knana man-soaha. Changsan nokni barandaona

re·bae gari bolsa a·tilao dongdipeako nikna man·aha. Changsan ua gariko doctorni ine chanchisoachim, indiba ua gari doctorni ong·jachim.

Garioni Choudhury aro Anjalee paningsasa ong·katbaaha. Uamang paningsako niksoe Changsan ka·dingsmite salam ka·soaha aro nokningona napbachina mol·molaha. Anjalee Changsanchipakko migitching niate pagipako ja·rikangpaaha. Uamang Changsanni nok barandaona sokangaha. Changsan noko cha·parike donggipa bi·sako chokki aro tebilko ba·rachi dokprongatchina aganaha.

: Kangalni noko ga·tapeani gimin anga da·al namen kusi ong·aha. Mitchijaode ka·sapae iano asongpabo. Changsan chokkiko jaksi otate mesoke asongchina aganaha.

: Chinga nang·ni noko asongna re·baja; indiba nang·ni kajia jikani giminsa re·bara. Choudhury rake indake inaha.

: Maiba kajiani ong·ode angko sasti on·bo; indiba angni nokona re·baeba na·simang maina asongjawa? Dai nangode uade ja·mani katta. Da·ode na·simang angni noko angni 'guest' ong·a. Asongjaode anga namen gisiko duk man·gen. Ka·sapae asongpabo. Changsan kattako rinokate mol·molaha.

Dikdiksa jajajiji dake Choudhury demechiktangko "*ai, hai dikdiksa asongna*" ine paningsaan asongaha. Asongarian ua Changsanchipakko niate indake inaha.

: Changsan, nang·ni kosako angni matnangani donga. Na·a maina angni chakkol bi·sa Jitenko sriksrik rime katbana nanga? Nang·ni ia kamara namama?

: Sriksrik rime katbaa? Na·a maiko aganenga

Choudhury babu, angade mamingko ma-sinan man-jaengjok. Changsan Anjaleechiko niate ka-dingaha.

: Ka-dinge kakket kattako donmitapna jotton ka-ode cholijawa. Na-a iani gimin aganchakna nanggen, Na-a angni chakkolko rimsrukana inditan ka-dongama? Choudhury ni ka-onangengako nika Changsan indake ka-sine inaha -

: Ka-sapae indinari ka-onangnabe. Sawa nang-na aganjok anga Jitenko sriksrik rime katbaa ine? Iarang tol-a kattasa. Saobasa nang-na tol-e aganenggen.

: Tol-e aganode Jiten maidake nang-ni noko ong-na nanga?

: Rama sambaosa uara saaeming tugope dongengachimba. Ukosa anga nikdikeming doctorona rimangaha aro doctorni aganatagitan da-o uko sanenga. Saa namjokode anga an-tangan uko rimange donigen ine unaba agane donaha. Na-a angko indinari nang-ni chakkolko rimsruke katbaa ine potainabe.

Changsanni "rimange donigen" ine aganani gimin Anjaleede pagipana kenesa Changsan indake aganenga ine chanchiaha aro Choudhuryba Changsan uni kattana nom-baenga ine chanchie rakkalbate uko bamatna man-na gita indake inaha-

: Nang-nin chu-gimik dos ong-aha Changsan. Maina na-a gipinni chakkolko rimbana nanga?

: Angni dos ong-aha? Ramao ga-ake donggipa saoba cholgriko dakchakoba dos ong-aiama? Changsan ka-donga gnangan inaiaha.

: Jawani chakkolko dakchakani nang-ni mai right donga?

: Jakgitel a-songni saksa jakgitel citizenko dakchakanaba dos ong-aiama? Na-songni nokni chakkol ong-anasan na-song uko skatang dokna aro jebaisi jakkalna man-aiama? Uni kamni biteko na-song ra-na man-a, maina ua na-songni chakkol, indiba uni be-en bimangde na-songni ning-o ong-ja, uade India Governmentnisa ong-a aro uni jama janggini Nokgipade Isolsan ong-a. Jiten bi-samiting, da-osa ua dal-baenga, una agreba ua saaenga, indiba uko indake ka-sanninggija dake dokaha, ua ramao re-baesa ga-ake ma-ame dongengachim. Anga uni indake ga-ake dongako nikdikeaha, uni gimin anga uko sanna nangao ga-akaha. Ian "right of humanity" ong-a. Nangnikgipako dakchakanan dos ong-aiode, anga ua dosni gimin sastiko man-a kenja, indiba ua nangnikgipako anga dakchakgija gelna man-ja. Anga duko ga-akgipa mandekosa dakchaka, na-songni chakkolko ong-ja.

: Na-a uko jokatna man-genma?

: Man-janaba donga, indiba anga jotton ka-anggen.

: Changsan, na-a angming kajiakosa jikenga. Na-a angming kajia ka-na amgenma?

: Ama amgijani katta ong-ja, nangode a-gilsakni bil baksaba dakgrikna nanggen, kakketni bidingo a-gilsakni je bil baksaba kajia ba warachakna ja-man chakjawa.

: Nangni seng-a dake katta aganako anga nigen. Na-a ang baksa dakgrikna ba kajia ka-na rabichongmotengaha. Anga nang-ko indin watjawa Changsan. Na-a angni gisikko ding-atnabe.

: A-bachengede anga darangmingba skang dakgrikjawa. Indiba saoba oniako dakode uming dakgrikna anga on-tisaba kensrangjawa.

: Nang-ni noktang ong-ani giminsa nang-ni seng-a dake aganarangko chakchikengjok, ong-jaode, nang-ni an-chi ding-e mesokako nigenchim, ine Anjaleeba ka-onange inaha.

: Noktang ong-ani giminsa angaba na-simang baksa nom-e katta aganengjok, gipin biapo ong-ode maibaan ong-enggnokchim. Changsan ka-dinge inaha.

: Changsan, na-a angni pagipako chonnikengaha. Ma-sia na-a saming seng-a dakenga?

: Kema ka-bo. Anga nang-pako maming saloba chonnikja. Angni bewalo ba katta agananirango maibakai chonnika gita ong-angode anga kema bi-a, kema ka-bo; maina iarang pilakan angni u-iani nalsaosa ong-naba donga.

: Skia pora donggijagipa Garo, Rabha, Koch, Hajong aro Bororang baksasa na-a an-tangko dal-a dake uamangni gitel ong-na man-aba donga, gipinmingde na-a indake seng-a dakna man-jawa.

: Skia pora donggijagipa songadamni manderangan ka-tongo kakketgiparang ong-a, uamangni ka-tongo maming cha-chipilani dongja, uni giminan anga uamang baksa dongpae bilongen kusi ong-a, maina, skia man-gipa songjinmani satanranggita gipinni sko kosako te-brong pe-e cha-gipa ong-na nangja, gipinko togie an-tangni okko gapatna nangja.

Choudhury aro demechikgipa Anjalee, Changsanni kattarangko knae bilongen ka-onangaha, indiba mamingko aganchakjaha. Choudhury Saheb uni chakkolni giminsan indake intaiaha -

: Jeba ong-bo Changsan, na-an angni chakkolko rimange donbana nanggen aro na-a nang-nian dos ong-aha ine ku-rachakna nanggen. Man-gen na-a?

: Angni dos ong·ama ong·ja uko anga aganna man·jawa; indiba Jiten gong·ode uko rimange donena angni maming neng·nikani dongjawa.

: Indide na·a da·al attamon rimangna nanggen.

: Ong·ja baba, ua maidake Jitenko rimanggen? Una bate da·o an·chingni gario rimpaon nambatgen. Anjalee pagipachiko nie inaha.

: Chong·mot, da·o rimangan nambatbebegin, indide Jitenko okamatbosong. Changsan Jitenko okamataha. Jiten kenbee dil·dile mikkangona re·baaha.

: Nang·ko nang' nokgipa rimna re·baaha Jiten. De, ua gario gadoe dongebo. Jiten a·o asonggopjolaha aro grape ua indake inaha-

: Angade uamangni nokchide re·angjawajok, dada. Na·a angko ka·sapae nang·ni nokoniko rikgalnabe. Nangode anga nang·ni nokon siaigen. Choudhury Jitenko domki on·e indake inaha -

: Ei, sala denggu bi·sa, na·a iano maina re·baa, ha? Bakbak nokchi re·bo, ong·kat !

: Anga na·songni nokonade re·angjawajok, malik. Anga ianon dongaignok, ine Jiten grapaha.

: Knajok uni aganchakaniko? Ua maiko inenga?

: Iarangde uni sola budi on·e donasan ong·a, baba. Ua Jitenko watna sikchongmotjaengaha, uni giminsa ua uko sola budi on·e, ku·chi kane donaha. Uko anga nachil sale rimanggen ine Anjalee asongaoni chakatange Jitenni nachilko rim·e sale “chakat sala gata” ineaha. Chagsanba chakatange sambachi re·ange “watbo. Saae dongenggipa bi·sako indake kenatna nangja” inaha.

Da·oba changsatai sambaona re·ange Anjalee Jitenni nachilko sale “chakat sala stupid, bakbak gariona re·bo” inaha. Changsanba Jitenna ka·sachake champengaha.

: Nibo baba, sola budi on-e done Jitenko re·angnan on·jaenga, ine Anjalee pagipachiko niate aganaha.

Choudhury Changsanko bilongen ka-onangaha aro indake inaha.

: Na-a angming mai chalakiko dakenga Changsan ? Gisik ra·bo, na-a wa·almingsa kal·grikengaha, chipumingsa bal·ekenga. Nang-ni kamni bite mai ong·gen chanchie nibo. Na-a kakketko aganbo, Jitenko watatgenma watatjawa?

: Ua re·angna skode re·angchina, dongna skode dongaichina; angni maming apotia dongja. Indiba re·angna gong·jaode nang-na kene uko anga re·angdraatna man·jawa. Anga nang-na bama aro nang·ko mande ra-a, indiba kenade ong·ja. Anga nang-ni ning-o kam ka·gipa nokkolba ong·ja. Nang-ni mikron gitcakate ka-onangani maming gamchatanian dongja angnade.

Choudhury Changsanko bilongen ka-onangaha. Ua maming kattakon aganna changpiljaha. Demechiktangko “hai ai, re·gnok. Ia biapo dikdiksaba dongani ong·jaha” ine chakatangaiaha.

Anjalee Changsanko indake inangaha -

: Gipinko jokatna nangja, da·ode an·tangko jokatnasa chanchisoaibo.

: Darangba darangko jokatna man·ja. Jokatna amgipa a·gilsako saksasan donga, uan Isolsan ong·a. Changsan uamang paningsa knaangchina gita rake inataha.

Choudhury demechiktang Anjaleeko rime tarake gari sale Changsanni a·tilaoni re·angaha.

BONGA

Zamindar Bhabesh Choudhury, Changsan Sangmako ka-onangbee uko maidake sasti on-na man-gen, uko chanchina aro budi ra-na ine ripengtanggipa Ukil, Gulsan Azizni nokona re-angaha. Jegitaba Changsanko uni seng-a dakani kri sasti on-na gisiko ka-kimchaaha. Maina, Changsanara A-chik, Rabha, Koch, Hajong aro Kacharirangko ku-mong nangrime ku-cholsan ong-ate dongatengachim. Uan a-ani bidingoba ia tribalrangko ka-dongataniko on-enga. Changsanko maibadake jailona watatna ba chipatna man-ode uni chanchianirang pilakan chu-sokna man-gen. Ua ripengtang Ukil Gulsan Azizchi re-ange Changsanko aro ua Garo, Rabha, Koch, Hajong aro Kacharirangko ua biaponiko rikgalna ku-pattianiko ra-na re-angaha.

Ukil Gulsan Azizni nok. Ua an-tang 'drawing room'-o asonge maiba ki-taprangko porae dongsoengachim. Ukil Saheb pringo Choudhuryko inksoe aiao inmanaha.

: Good Morning Aziz Saheb. Choudhury Salam ka-aha.

: Good Morning, good morning Choudhury babu. Maina indita pringoni da-asalde re-bajok? Re-babo, asongebo ine chokki ge-sako mesokataha.

: Mingsa nangchongmota kamni gimin nang-onan re-bana nangaiaha.

: Atcha, mai kam aganbosong indite. Aziz Saheb sing-aha.

: Angni patta a-ani gondogol ong-engaha, na-asan uko maiba budichi namatna man-gen ine anga ka-dongenga. Na-a je cholchiba angko dakchakchong-motbo. Choudhury chokkio asonge inaha.

: Maidake ong-manchaa ua gondogolara? Name aganbosong. Ukil sing-aha.

: Angni hajal gnimang bigha ong-gnigipa a-arango tribalang, chong-motan, Garo, Rabha, Koch, Hajong aro Kacharirang dongengachim. Uamang angna game man-aniko bakchikkingoniko bak gittamrangde on-rongachim. Indiba ia a-arangde angni pattani a-arangsa ine aganaonin uamang angna mamingkon on-srangjawa ine rake jechakengaha aro uamang mirangkoba drae rattokengaha. Uni gmin anga ia burbok tribalangni kosako 'case' ka-na nangao ga-akengaha. Mai dako namgen na-a angna dakchakangbo.

: Indide uamangni mi ratmitingo Policerangko rimbae 'arrest' ka-atna man-a nanggen. Aziz aganaha.

: Na-a angni gitcham ripeng ong-a. Nang-na anga pilak kattarangko donnugija aganaha. Mai dako namgen uko na-an dakaibo. Nang-na angade ka-dongengjok. Tangka paisani gimin na-a mamingko chanchinabe; uko anga nangagitan on-aigen. Choudhury aganaha.

: Tangka paisa nangja, tangka paisako ra-e mai ong-gen? Ripengde tangka paisana bate namen chugipa gadangni ong-a. Ripengkode tangka paisachi brena amja. Na-a mamingna jajrengnabe, anga nang-ni gimin jekoba

dakna jotton ka-chongmotgen. Na-a mingsa kamkosan dakaibo. Police Officer baksa gronggrike ia obostarangni bidingo aganbo, nangode ritchabonga ba hajalsamang uamangna on-chengbo, nang-ni maming noksan ong-jawa. Aziz Ukil ripenggipana aganaha.

Angaba indaken chanchienga. Atcha, indide da-o anga Thanaona re-angjolaignok. Na-a ia 'case'- ko ka-sapae 'take up' ka-chongmotbo. Choudhury re-angna chakataha.

: Anga pangnan nang-mingan donga. Na-a mamingna jajrengnabe. Anga nang-ni 'case'-ko jako ra-chongmotgen. Ukil aganaha.

Ruuta somoina uamang ripeng sakgni 'case' ka-ani bidingo rokomari kattarangko bikpil bawil chanchiaha. Maidakode 'case' ka-e amna man-gen aro ua Garo, Boro, Rabha, Koch, Hajong aro gipinrangko ua biaponiko rikgalna man-gen, rikgalani ja-man maidake non-tribalrangko, mongsongbate banggalrangko uano songdongatma man-gen ua pilakni gimin uamang sakgni ning-tue chanchiaha. Ukil Gulsan Aziz "*GREATER KARAIBARI STATE*" dakaniko jumang nikaha aro Choudhuryara a-a bang-e man-aniko gisiko chanchie bilongen kusi ong-aha. Sku ata bajimangosa Choudhury ripengtang Aziz Ukilni nokoni chakatangaha.

Uni walon choudhury Saheb joljol OC- ni nokona re-angaha. Choudhuryko niksoe uni re-baani miksonganiko sing-soaha aro asongchina aganaha. Choudhury a-selrangko kan-dike Thanani OC- na aganaha aro uni dakchakaniko nangchongmotenga ine inaha. Asol kattarangko ma-siani ja-man Thanani OC an-tang skoko brike indake inaha.

: Dakchakna man·ade man·gen, indiba kattade on-tisa rakaan, chanchie nina nanggen.

: Iani bidingo jegita hajalba tangka nangchina anga on-naigen. Na·a mamingko dakna nangja, uamangko 'arrest' ka-mangmange thanaona sokatna nanga, ja-manni kamkode anga an-tang ka-aigen. Choudhury aganaha.

: Thanaona (Police station) rim-banade man-aigen, indiba ia kam 'illegal' ong-enga. Chingna on-tisa dikdar ong-gen. Thanani OC aganaha.

: Angna dakchakgipa Aziz Ukil donga.

: Sawa ? Ukil Gulsan Azizma?

: Oe.

: Indide maming kenani dongja. Na·a 'case'-ko thanao on-e donangbo. Uni ja-man maiko dakna nanga chinga dakaigen. Na·a mamingna jajrengnabe. Ua iarangni bidingode namen changgipa sappipa Ukil ong-a. Indiba ua tangka paisarangnasa on-tisa mikbokrakgipa ong-a. Chong-motde, indaka kamrangkode darangba tangka paissa gride ka-na gong-rongja.

OC-ni kattarangni ortoko Choudhury namen ma-siaha. Maina, chakkori ka·a gimik jerang indaka kamrangkon ka-baengaha, uamang jako 'case' man-jakode tangkani a-kolkosa nika gita daknikman-aiaha. Bang-bata Ukilrangni gisikba indaken apsanaia. Uni gimin Choudhury una dingtangmancha on-na gisiko chanchie donaha. Iachi uachiko nie darangkoba nikna man-jae Choudhury OC-ni sambasrangona re-ange nachilo pa-dite ka-sine indake aganaha-

: Na-simang mamingna jajrengnabe. Anga tangka paissa gride indaka kamrangko darangkoba ka-atrongja.

: Anga nang-chiko mamingko ra-na ba bi-na skani dongja Choudhury Saheb; indiba angni staff- rang on-tisa namnikjawa, maina ia kamara 'illegal'.

: Na-a mamingna chanchinabe. Angni kam chu-sokahaode, on-tisa ong-ja bang-en man-gen. Ia hajalbongako alamala ra-rikchengbo. Iachin nang-ni staff-rangko kusi ong-atchengbo. Anga dingtangmancha nang-nade ja-man chanchigen. Uamangko jailo chipatna man-ode, anga nang-na 'special' boksisko on-gen. Indide da-o anga re-aignok. Good Night. Choudhury OC- ni quarteroni ong-katbaaha.

: Good Night. Na-a mamingna jajrengnabe Choudhury Saheb. Anga jekoba dakaigen.

OC ka-dingsmite Choudhury ni donanggipa tangkani bundleko ra-e nokningchi napangaha.

DOK

A-bani mirang mintokaha. Bilseng, Panthoria, Biren, Lokeng, Nisad aro Biligra, uamang an-tangtangni manderangko rimtoke a-baona mi ratna re-angaha. Ja-man ja-manan Changsan, Maireng, Upen aro Daharmangba nirokna gita a-baona re-angaha. Apsan sokange uamang asonge golpojoljole biri, tamaku aro sada dol-e ringtokengachim. Ia bilside miba namen nambeachim. Biri, tammaku aro sada dol-e ringmana ja-man mi rattokengaha. On-tisa somoini gisepon uamang mi bang-e rataha. Unon Biligra ratgalgalchina pilakkon mikrakataha. Salgni salgittamrangni gisepon uamang mi rataniko matchotna nangen ine ku-mongtokaha.

: Choudhury uni manderangko rimbae ratatna skangan an-ching matchotskana nangen. Ong-jaode ua Mymensingh aro Rongpurni banggalrangko rimbae rattokangnaba donga. Bilseng aganaha.

Ua somoion Changsan, Maireng, Upen aro Dahar Boroba ua mi ratenggipa biapona sokbaaha. A-bani mi chinok chinok nambeani gimi uamang namen kusi ong-aha. Uamang an-tangmang ratjaoba ba ratpajaoba uamang baksa dongpae uamangko ka-dongataniko on-engachim. Unon Lokeng aro Nisad uamangni sambaona re-bae uamangko salam ka-aha aro asongchina gita a-o gamcha ane on-aha. Indiba Changsan aro

Maireng 'nangjawa' ine gamcha ane on-gipao asonggija a-on asongaha. Lokeng, Changsan aro Mairengna cha ra-bachina gita Panthoriako aganataha. Cha ringjawa inoba Lokeng "iade angni saksanni cha ong-ja jinmani chasa. Chinga pilak gilgrime da-al mi ratani salo kusi ong-nasa taria" ine inaha.

Changsan aro Mairengde cha ringmanani ja-man pilakkon mittele a-bani mirangko nijoljole sakgni golpoe re-angengachm. Rama joljol Changsan aro Maireng indake chanchiangengachim je, ia Garo, Boro, Rabha, Koch, Hajong aro Banai, da-al pilakan ku-mong nangrime, ku-cholsan ong-e, tangka paisa gilgrime, mi ratani salo kusi ong-en indake jugal ka-aha. Iamang da-o dingtang dingtang jatrang ong-oba pilakan tribal bimingko man-giparang ong-a aro changsaode, badiaba chasongode haida iamang Ma-ambi apsanninchim. Somo nawangni sagalo da-o uarang guala skalni minokako man-e uni okningo chaprangkae jringjrotna pindape dongengaha. Ua batanggimin somoirangko bikpilate nina man-ode nikna man-genchim, haida iarang pilakan apsan "*Human Tree*"-onin ong-bagiparang ong-a. Indiba da-asal ia jatrang dingtang dingtang jatni bimingko ra-eba apsan ku-monge nangrime, ku-cholsan ong-e, mi rattokenga, cha ringrimenga. Indake nangrimaniko nike Changsan aro Maireng bilongen kusi ong-aha. Mikkangchiba indaken nangrime ku-monge dongangode darang gipin jatrang, an-chingko, an-chingna bate skia pora man-giparang, chalaki batgiparang aro bida budi donggiparangba cholete, mikchepe, onchepe an-ching tribalrangko jakkalna man-jawachim aro pa-jawachim.

Indake Changsan aro Mairengni mi ratgiparangko nirokagita a-barangko re-wilwile wene dongmitingon ua biapona Jeep gari bolsa aro Maruti car bolsa sokbaaha.

Maruti car-o Choudhury aro Jeep gario Police Sub- Inspector, un baksana sakdok policerang. Mi ratgiparangko 'arrest' ka-china gita Police Sub- Inspector uni policerangko ge-etaha. Policierang mitam mi ratgiparangko jaksil (*handcuf*) pataha aro mitamrangko buduchi katokaha. Saksakoba watjachina Police sub- Inspector ge-etaha. Saoba katna jotton ka-ode ba golmal ka-na am-ode uamangko riffle- chi goaichina ine ka-mikkenataha.

Policierangko niksoarian Changsan Mairengkode katchina mol-molaha. Maireng katjaengachim, indiba Changsan uko indake inaha -

: Maireng na-a ia burengjoljol katangbo, maina, an-ching sakgnini gisepo saksade jokna nanggen, ong-jaode an-ching pilaknan namjawa.

: Na-a katbo ada. Na-a jokon pilakna kam ka-na man-gen. Anga jailonaba re-angaigen. Maireng inaha.

: Maireng, bang-a kattarangko agane somoi nosto ka-nabea. Na-a angko nang-ni adatang chanode, da-o anga nang-ni adatang aganenga, na-a ia burengjoljol katanggalgalbo, angni kattako knachakbo aro songni manderangna kobor on-ebo. Changsan aganaha.

Maireng Changsanni kattako galna man-jaha. Ua burengjoljol dongnue katangaha.

: Sako kana am-engga sala jawani nokkolrang mangmang? Biligra Policierangko inaha.

: Jrip achak. Bang-a katta aganode bondukni guliko cha-na nanggen. Police Sub- Inspector domki on-aha.

Police inspectorba ong-china jeba ong-china, da-asalde watjawa. Lokeng ka-onange inaha.

: Jrip nonsense. Suwarrang. Police Inspector inaha.

: Chingko suwar ingipa, nang-ko
Biren ka-onange aganna man-jaha.

: Dokchongmotgen salarangko, je' óng-ode ong-china. Panthoria, Nisad, rim-bo sala achakrangko. Bilseng ka-onangbee inaha.

Uamang Sub- Inspector aro policerangko mi ratgipa atchilirangchin den-na chaangtokaha. Sub- Inspector aro policerangba rifle- ni benetchi su-na chasoaha. Ua biapo namen gondogol ong-aha. Ua somoion Changsan mikkangona re-ange indake inaha -

: Jrip dongbo Bilseng, Lokeng, Biren. Na-simang mamingko daknabe. Governmentni mande baksa jegrike maming lap dongja. Uamangni kusi gita jekoba dakangchina. Ainni mikkango je bichal ong-gen uan ong-aigen. Changsan aganaha.

Changsanni kattako manie Bilseng, Lokeng aro Biren jrip dongtokaiaha. Indake jrip dongmitingon uamang sakgnikoba 'arrest' ka-angaha. Pilakko 'arrest' ka-manani ja-man, Sub- Inspector, policerang aro Choudhury Changsanni sambaona re-baaha.

: Kema ka-bo Changsan babu, nang-koba 'arrest' ka-na nangao ga-akengaha. Sub- Inspector inaha.

: Nangnikode 'arrest' ka-na man'a. Changsan jak samgniko policerangchipak snilatata.

: Handcuf patbo, Inspector Saheb. Choudhury ka-sine Inspectorni nachil sambao inaha.

: Nangjawa. Inspector aganchakaha.

: Indide da-o banona re-angna nanggen, hai re-bo. Changsan inaha.

: Bachi? Da-ba ma-sikujaenga? Choudhury inaha. Uamangko 'arrest' ka-atna man-e Choudhury da-al bilongen kusi ong-aha, indiba Changsanni jako handcuf patjani gimin gisikode Choudhury Inspectorni kosako kusi ong-brejaha.

: Nang-o anga sing-jaenga aro nang-o singani maming dorkarba dongja. Indinari maina ong-gija nanggija kattarangko aganpa-rokenga. Changsan Choudhurychipakko niate inaha.

: Ka-onangnabe Changsan babu aro na-aba maming kattako aganabe Choudhury babu. Kema ka-bo Changsan babu, da-o na-simang Police stationona re-angna nangenga. Inspector aganaha.

: Mittela. Anga re-angaigen. Hai Inspector Saheb, re-dilbo. 'Arrest' ka-a man-gipa pilak manderangko jrip jrip re-china Changsan mol-molaha.

: Changsan babu, na-a chingna ku-watbo, nangode ianon sipileba iamangming dakgriksranggen. Chingade chakchikna ambajaengaha. Kaa man-giparang jinma inaha.

Jakchopjole Changsan pilakkon mol-molaha aro ia kajiade ain baksasa ong-enga policerang baksa ong-ja. Uni gimin chakchikchina aro pilakan jrip jrip maming nanggija kattarangko aganjachina mol-moltaiaha.

Police Sub- Inspectorba Changsanko namen mande ra-a, maina, Changsan saksa namgipa mande ong-a. Ua jolni je jat tribalrangde Changsanko namen manibea ine Police sub- Inspectorba ma-siachim.

: Changsan babu, hai indide re-gnok ine Police Sub- Inspector inaha.

Pilakna skang Inspectoran re-dilaha, uni ja-man Changsan aro Choudhury. Bon-kame, ua game su-e

cha-gipa manderangko policerang mitamko budurangchi
kae rimtokangaha.

Pilakan Thanaona soketokaha. Rokomari budi dake
uamangko jailo chipataha. Ia pilak ong-arangni ja-tingo
Ukil Gulsan Azizni jakchim. Uni budichi aro
Choudhury ni tangkani bilchi Changsan aro game cha-gipa
pilak manderangan jadokna jailo dongna nangaha.
Uamangko dakait ka-ani 'case'- o galaha. Uamang
wagam chikmijile chakchike jailona re-angtokaha. Uni
ja-man Choudhury Mymensingh aro Rongpurni
Banggalrangko rimbae mirangko rattoke ra-angaha. 'Case'
ka-ani tangka paisarangkode ua minikon man-aiaha. Ua
bang-e mi man-aha.

: Na-a maingsa kam ka-galgalna nanggen. Ia
biaprango tarake dingtang manderangko songdongatna
nanggen. Ong-jaode gamgija donai gipa biapo saoba
re-bae dongdraeode, uko rikgalna namen neng-beani
ong-gen. Ukil Choudhury na ku-pattiaha.

: Oe, angaba indaken chanchienga. A-ako gamgija
indin donaiode namade ong-jawa. Indiba baoniko indita
manderangko man-gen. Choudhury sing-aha.

: Na-a mandeni gimin jajrengnabe. Anga chu-onga
gita manderangko rimbana man-aigen. Uamang namen
kangal, indiba a-ako gamanio, mi sika aro ge-anio
uamang nambatgiparang ong-chongmota. Uarangan
an-chingni kattarangkoba maniaigen. Ukil aganaha.

Mitam kattarangkode ja-man chanchiaignok ine
uamang sakgni uni salode noktangtangchi re-angaiaha.

Baditaba jarang skangni katta. Changsao Changsan uni ripengtangni nogipani biako cha-na re-angachim. Uni ripengtangni bimingko Surojit Chakraborty mingachim. Uamang apsan college-on poraiachim aro sakgnian "*All India Student Union*"- ni leader chim. Nogipani biao Surojit Changsankoba okamatachim ba 'invite' ka-achim.

Changsan Surojitmangni nokona sokaha. Surojit baksa ua Surojitni tusigipa kuturio asonge ripengskarangming golpoe roengachim. Unon Surojitni nogipa chonbatgipa Changsanni re-baako knae Anjaleeko rime adatangni tusigipa kuturiona napbaaha. Surojitni nogipako Chandini mingachim. Chandini namen katta aganbegipachim. Ua Changsanko indake sing-aha -

: Dada Changsan, na-a re-baaha namen namaha. Indiba na-a angni ripengko nikama nikkuja. Ua angni ripengba ong-a aro manitangni bi-saba ong-a. Na-a uko ma-sikujakon haida.

: Nikjok, ma-sijok. Uko anga da-alna skangba grongaha. Salam, Anjalee Choudhury. Jakchopjole Changsan Sangma Anjaleechiko niate Salam ka-aha. Anjalee Surojit pagipani nogipani bi-sa ong-a ine Changsande u-ijachim.

Anjalee aro Chandinini bils i apsan an ong-gen. Bils i chidok ong-jaoba chisnirangde ong-gnok. Sakgnini

gisepo haida jagni ba jagittamransan dingtangrikani ong-aigen. Adatang Surojitni ripeng ong-ani gimin Chandini Changsankoba adatang chong-motgitan dake chanchiachim. Ua Changsan baksa rokom chokom kattarangko agangrikrongachim, bal-ekrongachim.

Changsanni salam ka-ato Anjalee mamingko aganchakgija kratcha-e denggoke dongaiaha. Ua kratcha-bee aro dongsiksakbee mikkang gitchakpilaha. Changsanni asongenggipa kuturio napdik man-e ua namen dongsiksakengaha. Ua Changsanko ninan sikja aro una mitchia indiba da-al umingan katta agangrikna nangengaha. Ua biaponi chakate katangnaba ua man-jaha aro indecency ong-gen ine chanchiaha. Unon Chandini changsanko indake inaha -

: Basakonin anga nang-ko grongna sikengachim dada. Da-asalsa grongna man-jok. Abini bia ong-kujaode na-a haida da-alba re-bajawachim.

: Grongade grongjok, indiba grongna sikanisa namama namkuja ukosa u-inan man-jajok.

Changsanni kattako knae Surojit aro Chandini adasade ka-dingaha. Anjaleeba ka-dingnade sikachim, indiba ka-dingna skako ra-chipe ua denggoke dongaiaha.

: Grongna skani chu-ongama chu-ongkuja uko u-ie nang-ni maming lap dongja. Anjaleeara nang-ko nina manchasa re-baaba. Chandini Anjaleechiko niate bal-ekjolataha.

: Angko nina mancha? Changsan ka-dinge sing-aha.

: Oe, nang-ko nina manchaan dada. Chandini aganaha.

: Angara maiba nignigipa bostuma? Indide angni

bimingba "*Wonders of the World*" ingipa ki-tapo dongna nangaha. Dongnaba nangan, maina angni be-enara do-ka gita sima, mikkang simpanjee gita daka, bimangara bengblok gita okming skoming kang-karemingan apsan; indakarangni kride haida angan, bimangni competition ba susaanio skanggipa ong-na kraa. Atcha, indide da-o aganbosong, a-gilsakni ia aiao in mangipa janggi gnanggipa jontuko na-a maidake nika?

: Na-ade srechi tape, ku-sikchi cha-tote nina man-gipa bostu ong-ja, uni gimin, chi-a, ka-a, sipaka, mesenga, jal-lik gita saa ba brapa mamingkon aganna man-jawa. Chandini inaha.

: Mittela. Anga nang-ni '*presence of mind*' dongani gimin uko mittelachi parakgija jrip dongna man-jaha. Indiba an-chingni gisepo saksade mamingko agangija jrip knatimesa dongaengaha. Indake jrip dongani ortoara '*silence means consent*' ong-jaoba haida ua an-chingni kattarangko namnikjaengakon. Changsan inaha.

Kattako indake agane ua Anjaleechipakko srik niataha. Anjaleeba Changsanchiko changsa mikgitching niataha. Unon Chandini ka-dingsmite indake intaiaha.

: Anjalee saksa namen chanchirakgipa ong-a. Ua indinari ong-gija nanggija kattarangko ramram aganrongja; maina, saobarang uni ka-tong noksiko gitikgitak napdranaba donga. Uni gimin ua jebaisi katta aganrongja.

: Na-a namen denggu, Chandini. Anga nang-ming mamingchiba re-pajawaha da-ode. Anjalee bilonge gisiko saagnang aganaha.

: Uni ka-tongde Sahara a-gisi gitasa. Uni ka-tongo ka-saani ka-singipa mikka maming saloba wadapkuja. Chandini inattaiaha.

: Indake inabe, Chandini. Nang-ni chanchichipa

namen gualani ong-a. A-gisini jatchioba suk ong-atna man-gipa a-sal gnanggipa chibol (oasis) donga; uko na-a ma-sijama? Me-chikni ka-tong jegitaba rakchina, jegitaba a-gisi gita a-sal gri wakekrak ong-china, uni ning-o badiaba biap gitade rinokani, ka-saani ka-sinbegipa chibol dongchongmotaia. Indiba uko am-esa man-kujaenga. Sahara a-gisio badita sila aro ka-singipa a-salgnang chibol donga, uarangko na-a chonmitingo Geography- o poraiman-jama?

: Indide na-a changsamang jotton ka-e niboda, dada; haida ge-sa ka-singipa silbea chibolko am-e man-arok. Chandini Changsanko bal-ekaha.

: Na-a angko chonikenga Chandini, anga iano dikdiksaba dongna sikjaha. Anjalee kratchae aro gisiko duk man-e re-angna chadengaha.

Unon Surojit nogipa Chandiniko manengagita indake inataha-

: Chandini na-ara bal-ekari dongaigenma, ma cha aro cha-anirangko tarigenma. Changsanna aro Ajaleenade da-omangba chakon on-kujaenga. Tarake charangko ra-ebo. Anjaleechiko niate "Anju, na-a Chandinini bal-ekana gisik sanabe. Na-an u-ia ua chononin bilongen 'talkative'. Surojit Anjaleeko ka-dimeataha.

Adagipani manengana Chandini ua kuturioni ong-katangaha aro uni ki-sang ki-sangan Surojitba "*na-simang dikdiksa asongsobo*" ine gipin sokbagiparangko nirokna ong-katangaha. Ua kuturiode Changsan aro Anjaleena agre darangba dongjaha. Sakgnian maming kattako agangrikgija jrip dongaiaha. Budi dake Surojit aro Chandini uamang sakgniko ua kuturio galangaha.

Ruuta somoina ua kuturio asonge dongeba katta ku-saba aganjani gimin Changsan indake inaha -

: Maina na-a katta aganjaenga, Anju?

: Anga nang-ko mitchia aro namnikja. Anjalee aganaha.

: Uko anga u-ia. Indiba, anga nang-ko mande ra-na namnika, Anju. Anga nang-na ka-saa. Nang-ni angna mitchianikon anga namnika. Anga nang-na ka-saa. Changsan intaiaha.

: Nang-ni angko mande ra-ako angna nangja, nang-ni ka-saakoba angna nangja. Nang-ni kattako knajokon anga nachilo knadika, angming katta aganabe. Anjalee ka-onangagnang inaha.

: Saobani nangnikani gimin saobako mandera-a ong-ja aro nangnikani gimin skatang darangba darangko ka-sana amja. Ka-saa aro mandera-ani, iarang darangni nangnikani a-palosa. Una agreba ka-saanio darangni nangnikani aro nangnikgijani kattaan nakatna man-ja, Anjalee. Anga Gautama Buddhako namnika. Christian ong-ani gimin anga Gautama Buddhako namnikna kraja; indiba angni ka-tong namnika. Ka-saa ka-tongni dingtang mancha torom ong-a. Ua darangni nangnika aro nang-nikgijaniko nichakja. Ka-saa ka-tongni torom chong-mot. Ia logical aro illogicalni a-palosa ong-a. Mande mandena ka-saa. Changsan inaha.

: Ka-saaode, minisalo maina babako aro angko chonikjok?

: Anga na-simang paningsako maming dakeba chonika dongja. Maibarang katta chonikagita ong-ode, indide ua kakketko donnugija agana nangnikanisan ong-aia.

: Jawani chakkolko sola budi on-e rimsrukange gipinko dikdar on-ara nang-ni kakketko nangnikaninchimma?

: Changnichang rimsrukanga ine angko potnabe

aro dosinabe, Anju. Angna maina chakkol nanga? Anga an-tangni okko gapatnan man-jaenga, chakkolna anga maiko on-gen? Indaken na-a chanchiengode, na-a an-tang re-ange rime ra-aibo. Indiba gisik ra-bo, Jiten gong-osa ia kam ong-na amgen, gong-jaode uko drana man-jawa, ong-jaode anga Zamindar, man-e cha-gipa, tangka paisa, bilgnanggipa Choudhury ineba angade bang-e chakchikna man-jawa. Gong-jaode angan uko rimdraangna on-jawa. Anga na-simangko namnika aro mandera-a, indiba na-simangna kenade ong-ja, ia kattako ka-sapae gisik ra-bo.

Ua somoion Chandini ua kuturiona jako chani tray- ko ra-e napbaaha. Anjaleeni ka-onange kratcha-e mikkang gitchak gitchak dakako nike Chandini Changsanchiko niate “mai ong-jok dada? Anjaleeko na-a ka-onangatama”? ine sing-aha.

: Angade uko ka-onangatja. Ua an-tangtangska ka-onangenga. Iarangde ramramsa. Na-a balwani giminde u-iaan. Je balwa sal ding-mitingo srisri balbae mandeni be-en bimang aro gisik ka-tongko ka-srokata, an-saoata, kusi ong-ata; ua apsan balwaan badiaba somoiode bilongen balrake, balmindurini bimango buiring- samring, nok- jamrangko balpakange, kningate, manderangni ka-tongo jajrengata, kenata aro dukniko ra-baronga. Rinokanian ka-tongo rakani aro indake rakani ning-on rinokani donnue donga, ian ong-telaigipani niam ong-a.

Ua batanggimin salrangode Anjalee Changsanko bilongen ka-onangachim. Indiba da-asalde ua Changsanmangkon gisik ra-batengaha. Uni gisik da-ororode pangnan sikdikdik ong-e dongrongenga. Colle-ge- chiba re-angjaengaha. Darangmingba ua bang-a katta aganjaengaha. Radiokoba knaja aro cinema nina ba TV serialrangkoba ua ninan sikaengaha. Maiba maiba ki-taprangkosa ua porae dongrongengaha. Gana, china aro

be-entangrangko tarinaba ua sims .kjaengaha. Maibako chanchisime donga gitasa un. gisik ong-engaha. Changsanko pattoko ba jailo chipatako ua namnikjaha aro uni giminan ua gisiko kusi ong-na man-jaha. Ua Changsanko namnikjanaba donga, indiba Changsanko pattoko chipatakoba ua namnikjaha, namnikna man-jaha. Changsanni gimin chanchie ua gisiko bilonge duk man-a. Ua saksu rinokgipa ka-tongni mande ong-a, indiba namen ka-donggipa, seng-gipa indiba uo gaora dongja, bida gnanggipa indiba namen kam ka-gipa, bilaka indiba ua sontol---- indakgipa mande saksako pattoko chipatako ua namnikja. Basakoba ua pagipako agane pattokoniko Changsanko jokatna chanchia. Indiba uamangni chakkol Jitenko rime katangako gisik ra-jokode gisiko ka-onangmana. Iarangni gisepon ua Changsanni agangipa kattarangko gisik ra-a. Changsan changsao indake inachim- *“na-an ma-sia Anjalee, anga nang-na ka-saa, nang-ko mandera-na ska”*. Changsanni indake agangipa kattarang uni ka-tongni so-omgipa biapo bilongen nangdikea. *“Ua angna ka-sachongmotbebeama, angko mandera-na sikbebeama”* ine gisiko ua an-tangkon indake sing-ronga. Uni ja-manba ua Changsanni indake agangipa kattako gisik ra-gitikaha *“anga na-simangko namnika, indiba kenade ong-ja”*. Maidakgipa ka-dongani kattako aganachim Changsan. Uni ka-tong an-tangtang chanchie nom-bokangaiaha. Changsanni gimin chanchie aro uni kattarangko gisik ra-e ua darangni gimin chanchinan somoi man-jaengaha. Da-ororode pangnan Changsanni kattarangsua uni ka-tongko dokol ka-engaha. Changsanni jama janggisa uko kal-akengagita daknikman-pilengaha.

Changsanmang pattokoni jokbana bang-a sal dongjaha, da-o antisamangsan dongengkuaha.

CHET

Ukil Gulsan Aziz aro Zamindar Bhabesh Choudhury Mymensingh aro Rongpurni gipin jatrangko rimbae tribalrangni a-o asongataha. Uamangni miksongara "GREATER KARAI BARI STATE" bikotani ong-a. Tribalrangde uamangni miksongao dakchakpa-jawa ine kenchake uamangko rikgalna jotton ka-engachim. Indakesa Choudhury a-arangkoba sriksrik an-tangni bimingo patta daktoke ra-achim aro ua biaprango donggipa tribalrangko sinjetna, rokomari dake duk on-a, mitamrangkode pattoko chipate jajrengatna aro ua biaprango wate katchina budi dakengachim. Aditade uamang chu-sokbaengaha ine gisiko chanchiengachim. Jegita dakeba tribalrangde kattokaigrok ine uamang chanchiengachim.

Tribalrangni a-o songdongatani gimin uo re-bagipa Banggalrang gisikode namen jajrengengachim. Garo, Rabha, Koch, Hajong, Boro Kachari aro Banairang uamangko je somoioba bobil dingbanaba donga ine uamang kentoksoengachim. Choudhury ia dos grigipa tribalrangni a-arangko onia dakesa patta dake ra-achim. Tribalrang ramramde a-ako wate on-na sikjawa ine uamang chanchisoengachim.

Tribalrangni a-arango re-bae songdongegiparangni dilgipani bimingko Matbor Sahebali Sheik mingachim. Ua

an-tangni manderangko timolbae melaengachim. Ua pilakkon simsake aro mikrake dongchina ku-pattiengachim. Maina, je a-arango uamangko asongataha, ua a-arang tribalangnisa ine uamang ma-sina man-achim. Tribalrang je somoioba uamangko bobil dingbanaba donga ine uamang chanchisoe dongsoengachim. Da-ode tribalangni dilgiparangde pattokosa dongkuenga ine uamang ma-siachim. Uamang jobbajokode maiba gondogolrangkode ka-chongmotaigen ineba uamang kensoengachim. Indake Matbor Sahebali Sheik, an-tangni manderangna ku-pattie dongmitingon Zamindar Bhabesh Choudhury aro Ukil Gulsan Aziz ua biapona sokbaaha.

Maruti car- oni ong-katbae Ukil Gulsan Aziz "*namengama Matbor*" ine sing-eaha, indiba uamangni jinma tom-dake dongsoako nike uamang jajrengenga aro kentokenga ine Aziz ma-sina man-aha.

: Namenga hujur ine Matbor Sahebali Sheik aganchakaha.

Unon Ukil Gulsan Aziz uamang maina tom-dake dongenga ba jajrengengama ine mamingko sing-gija indake inaha -

: Na-simang nikahakonba ia a-arang badita nambea. Ia pilakan Zamindar Bhabesh Choudhury ni a-arang ong-a. Na-simang ia a-arango ge-bo gambo jeba dakbo. Ja-man jeko dakna nanga na-simangna dakgen.

: Dongade dongengjok oe hujur, indiba jailoni jobbatokjokode tribalrang chingko bobil dingbatoknaba donga, unasa chinga kensoenga hujur, ine Matbor Sahebali Sheik inaha.

: Anga maming saloba na-simangni namgijako chanchigipa ong-ja. Na-simang mamingna jajrengnabe aro

kenabe. Anga donga. Anga jekoba dakgen, Ukil aganaha.

: Bis Milla! jajrengade jajrengja. Indiba
bon-kamode chingaba ua tribalangni obosta gitan ianoni
kattaina nangjokode; Matbor Sahebali an-tang
ku-simangko rim-roke maibako niksamsogita aganaha.

: Che! che! na-simang mamingko chanchinabe.
Anga donga dipet na-simang mamingna jajrengna
nanganin dongsrangja. Anga na-simangna jegita bading
chiwalna "*business loan*"-ko ra-e on-aha, uandake da-o
anga na-simangna "*Agriculture Loan*"- koba dake
on-gen. Indiba mingsa katta. Na-simang bigha prako
maun gittam dake Choudhurya miko on-na nanggen.
Bilsu gittamrangni ja-man je chol dakeba ia a-arangko
na-simangni bimingo patta dake on-gen. Na-simang angna
dakchakangbo aro angni kattako bebera-bo, ja-man anga
ia "Garo Pahar"- gimikkon "*GREATER KARAIBARI*
STATE" tarigen. Na-simang anggo bebera-ode mamingna
jajrengnabe aro kenabe. Gisik nange ari webo aro
gambo. Anga da-o re-nakaha. Maiba nangnikanirang
dongode angna bakan kobor onatbo, Ukil Saheb
noktangona re-angaha.

Uni gisepon, Maireng, uamangni biaprango
Banggalrangko asongatani gimin gisiko dongtojae aro
uamangko maidake rikgalna man-gen iarangko chanchina
Garo, Rabha, Koch, Hajong, Banai aro Kacharirangni
songjoljol nokjoljol re-wine aganjoe nama chol bikotna
jotton ka-aha. Ua Changsanni namnikbatgipa ripeng
Surojit Chakrabortyonaba re-ange pilak ong-enggipa
obostarangni gimin aganeaha. Changsankoba jailo
chipataha inako knae Surojit rang-san gisik
dongsiksakjolaha. Zamindar Bhabesh Choudhuryko
grongchongmotna nanggen ine tik ka-aha. Bhabesh
Choudhury Surojitnian mamatang nanga. Bhabesh

Choudhuryi jikgipa Surojit Chakrabortyni pagipani
nogipa je-et ong-a, Surojitni manitang ong-a. Mairengna
ua da-oan Choudhuryi nokchi re-ange Changsanmangni
jokani cholko ka-gen ine ka-dongataniko on-aha. Surojit
Mairengkoba un baksa re-ode re-pachina ine aganachim,
indiba Maireng Chakraborty saksanan re-angaichina ine
aganaha.

Surojit Chakrabortymangni nokoni Maireng
ong-katange da-oba tribal jongadarangko ku-cholsan
krimkro ong-china ku-pattieaha.

SKU

Zamindar Bhabesh Choudhury ni nok. Choudhury aro Ukil Gulsan Aziz "*drawing room*"-o asonge katta agangrike dongenga.

: Namen namaha Aziz. Na-a nang-ni manderangko rimbae ua tribalrangni biaprango asongataha ia namen namaha. Da-ode Changsan aro uni dolrang maming dakna man-jawajok. Ong-jaode namen kenani ong-engachim. Choudhury indake aganaha.

: Oe, namaha. Na-a mamingna jajrengna nangja. Pilakkon anga dakangaigen. "*After all, you are my bosom friend*". Ukil inaha.

Indake uamang ripeng sakgnini agangrike golpoe dongmitingon a-palo saobani ku-rangko knana man-aha. Ua mande Choudhury Sahebko indake okamaha-

: Mama noko dongama?

: Sawachim, napbabo; ine Choudhury inataha.

: O! Surojit! re-ba asongbo ine Choudhury chokkiko jaksi otate mesokataha.

Surojit uamang sangniko salam ka-aha.

: Aganbosong na-a maina re-baa? Na-simang pilakan nokode namtokengakonba? Choudhury Surojitko sing-aha.

: Anga mingsa ning-tua kattako sing-nasa re-bara. Anga knana man-aha je, na-a tribalrangni a-o gipin manderangko asongatahana. Ia kattara ong-bebeama? Surojit sing-aha.

: Oe. Maina? Angni a-o anga je manderangkoba asongatgen, uana nang-niara mai ong-jok? Choudhury inaha.

: Angnide maming ong-ade ong-ja; indiba a-songni mandena ia namen dal-a onia ong-a.

: A-songni mai dal-a onia ba dos ong-aha uko aganbosong? Ukil Gulsan Aziz Surojitko sing-aha.

: Nang-na aganchakani angni maming dongja; maina nang-ni "*GREATER KARAIBARI STATE*" tarina jumang nikaniko chu-sokatnasa na-a indaka budirangko dakenga. Indiba mamade (Choudhury) ia biapnin mande ong-eba, maina a-songtango namgijaniko ra-bana chanchienga? Surojit inaha.

: Na-a an-tangko "*Patriot*" ba a-songna ka-sagipa dake mesoknabe. Na-a an-tangan Bengali ong-eba "*Garó Pahar*"- ni gimin maina chanchina nanga? "*Garó Pahar*" mikkangchi mai ong-gen uni gimin nang-ni maina sko saani? Choudhury Surojitko inaha.

: Sko saani maina ong-jawa? Je a-songo atchiaha, je a-songni miko, chiko cha-e ringe dal-aha aro ia a-songon dongenga, indakgipa a-songna chanchina nangani darang songdonggiparangnian (Citizen) daito ong-a. Surojitba aganchakaha.

: Indaka kattarangko game su-e cha-gipa jararangna, chadamberangna, aro me-chikmarangnasa re-ange aganebo, angni noko ong-ja. Choudhury ka-onangagnang inaha.

: Na-a maina ia biapni “*aborigin*” tribalarangko rikgale gipin manderangko (Banggalrangko) asongataha? Indake dakanichi mik kangchi nang-nan nambatjawa, namgija a-selrangkosa na-a okambaagita ong-enga. Anga ia Garo Pahar a-songni ka-tongo donge ku-mikchete aganenga, na-a ia Aziz Ukilni ku-pattiarangko ra-e an-tang ja-atangko ruachi den-kape ra-nabe. Ia a-songni manderangna namgniko chanchigija andalaona sikdodoangnabe. Surojit inaha.

: Nang-ni kattarang namen apchone chanchianisan ong-a. Nikjaengama da-ororo a-gilsako maidake cholienga. Da-ororoni “*INTERNATIONALISM*”- ni chasongo nang-ni “*PROVINCIALISM*”- de apchone chanchianikoson mesokenga. Nang-ni gisik bilongen apchona. Da-oni chasongo apale nianichi na-a chanchie kattarangko aganna changja. Mai Bengali, mai Muslim, an-ching pilakan India a-songni bi-sarang ong-a. An-ching iakoba chanchina man-a nanga je, a-gilsak gimikan an-chingni a-song aro a-gilsakni pilak manderangan an-chingni ma-gipa- pagipa, jongada, noabirang ong-a. Indake chona chanchiani gisikko ra-e a-gilsakna maiko dakna man-gen? Maidake mande ong-na amgen?

: Dal-gipa aro mingsinggipa mande ong-ani angni gisiko skani dongja. Indiba “*Internationalism*”- ni kattako agane aro uo pangchake dal-a dal-a “*lecture*” on-e ning-ning ning-ning a-songtangni sontolgipa manderangko togie dal-gipa mande ong-na skaniko aro ku-sikarichi a-gimikni manderangnan ka-saani aro namnikako mesokmike donnue donnue a-songtangni manderangko nokgri jamgri ong-ate, chalaki dake rikgale an-tangko namgipa ine mesokna jotton ka-aniko anga namniksrangja. Anga indaka kamrangna ka-tongonin mitchia. Surojit ka-dongen aganaiaha.

: Nang-ni chanchianirang bilongen namja, Surojit. Nang-ni gisik indita ona, indita apchona, anga maming saloba indake chanchijachim. Ukil inaha.

: Nang-ni gisik badita chua, badita nama, uko skangonin manderang u-itokaha Aziz Saheb; da-al ua kattarangko nakate maming lap dongja. Garo Paharni okningo "*GREATER KARAIBARI STATE*" bikotna sriksrik budi dakaniara nang-ni chua aro namgipa gisikni chanchiako mesokanima? Nang-ko anga u-ina bangki dongjaha Aziz Saheb. Indiba angni mamatang Choudhuryko anga indake mol-molangna skenga. Chong-motan, na-a ia namgija aro gimaagni kamoni chel-e dongan nambata. A-songna gimaagniko aro an-tangna namgijaniko na-a ra-banabe, okambanabe.

: Nang-ni ku-pattianiko angna nangsrangja. Anga nang-ko nina sikja, nang-ko anga mitchia. Choudhury ka-onage aganaha.

: Nang-ni noko ong-ani gimin na-a skatang jebaisi agana nangja. Na-a angko chonikna nangja. Nang-ni angko chonikaniba maming bil dongja. Surojitba inskataha.

: Kakket kattako aganode chonikasa ong-ama? Aziz inaha.

: Jrip, nang-ni ku-sikoniko anga mamingkon knana siksrangja. Surojit ka-onange inaha.

: Na-a agre katta aganabe, Surojit. Na-a angni noko re-bae angni ripengko indake choniknabe. Na-a u-ia, na-a sani mikkango katta aganenga?

: U-ia. U-ienba indake aganenga.

: Zamindar Bhabesh Choudhuryko ma-sikuja na-a ? Ka-onage mikrongitchakate Choudhury inaha.

: Baditaba salrangoni nang-ko anga dingtang dake ma-sibaengaha. Jensalo dos grigipa aro sontol game su-e cha-gipa tribalrangko budi dake 'arrest' ka-ate ra-angtokachim, uni salonin anga nang-ko skangna bate nambate ma-sisrangaha.

: "Shut up". Da-oan na-a ianoni katbo; ong-jaode policeko okamate rikongkatatgen. Paglaranggita dake katta aganabe iano. Maming chakkori bakkori ka-gija gunda dake bachi bachi re-ange melae saldonge rogen aro jebaisi skatang jeko man-a ukon chonike rogen; da-oan ianoni katbo. Choudhury ka-onange Surojitko a-rikaha.

: Indita ka-onangna nangja, mama. Anga nang-ni noko dongkamna re-baja. Na-a a-rikatjaoba anga an-tangan re-angaigen. Angko ka-onange aro policena kenate nang-ni maming lap ong-jawa. Nang-ni tangka paissa, gamjinni bil aro ia Aziz Sahebni chalakini bil ia Surojitko maming dakna man-jawa. Bebera-jaode Thanaona phone ka-ate nibo, mai ong-a ! Surojit uni asonggipa chokkio sronge asongsrangaha.

Choudhury bilongen ka-onangaha. Indiba ua mamingko dakna bil man-jaha. Ka-onanga amchakjae ua biaponi chadenge iachi uachi re-wingwange indake inaha

: Anga u-ia, nang-ni social status donga aro iakoba u-ia, nang-ni Political influence-ba donga. Na-a "*Youth Asociation*"- niba saksa dilgipa ine anga ma-sia. Nang-ni indaka dolrang donganasan na-a angko angni nokon chonikna kraama? A-songo 'court' aro adalatrang dongjama? Choudhury ka-onange aro gisiko duk ong-e inaha.

: Donga. Pilakan a-songo donga. Court, Kachari, ain, adalat pilakan donga. Uarang dongani giminan chasong chasongna game cha·gipa dos gri sontol tribalangko dakaiti 'case on·e pattoko chipatenga. Ain, adalat donga aro na·simang gita Zamindar aro ukilba donga. Una agreba rasong grigipa cholgri sontolgipa game cha·giparangba donga. Pilakan donga. A-songo mamingnian nangnikani dongja. Sujorjit chonika gita aganaha.

Surojitni chonike mikchepe aganani gimin Choudhury chakna ampilgija dake bilongen ka·onangaha. Aziz Sahebba ka·onangachim, indiba ua an·tangko tom·tomate rakkiaha. Choudhury wagam chikmijile sambachi re·ange rake chrike indake inaha -

: Surojit -----.

Ukil asongaoni chakatange Choudhuryi pakkreo jak done rimbae asongattaiaha aro indake inaha -

: Chakchikbo Choudhury, chakchikbo.

Surojit kengija aro jajrenggija ka·tongko ra·e ka·sine indake inaha -

: Agre ding·e mesoknabe Choudhury. Na·a angko maming dakna man·jawa, skode angasa nang·ko so·ote donangna man·gen. Indiba angni da·o skangni Surojitni ranta aro bewal dongjaha. Na·a angni mamatang ong·a. Kragijagipa kakketrangko aganani gimin na·a duk man·na nangja. Mikkangchinasa simsake dongbo. Na·a angni mamatang ong·jaode anga indita somoi chakchikjawachim. Indiba gisik rakbo mama, na·a ia Ukil Azizni ja·gao ga·akaha, simsake cholijaode na·a jokjawaha. Sakgnian simsake dongbo. Good bye. Good bye Aziz Saheb. Surojit ong·katangaha.

Choudhury aro Ukil Saheb, sakgnian jarachange knatimari dongrikaiaha. Skang Surojitni kengija, bamgija nawang dakarangko uamang ma-sia. Changsanba timing timang bingbing bangbang dakaigipachim. Changsan aro Surojitna darangan kentokachim. Apsan poraimiting somoionin uamang namen ripengchim aro jeko dakoba kengijaan dakaiachim. Da-ororode adita rinokgipa aro bamgipa ong-aha sakgnian, indiba skangni an-chi da-oba uamango dongkuenga. Una agreba, uamangni jako gundarangni dolba dongachim. Sawa u-ia, haida da-oba dongenggen. Choudhury aro Azizni gisiko jajrengani napaha. Changsan pattokoni jobbajokode Surojit baksa nangrime maikon dakgen, unaba uamang kensoengaha.

CHIKKING

Garó, Rabha, Koch, Hajong aro Kacharirangni a·ako sriksrik patta dake ra·e uamangko budi dake jailo chipatani ja·man uamangni biaprango Mymensingh aro Rongpurni Banggalrangko asongatani gimin Surojit Chakraborty bilongen gisiko suk ong·jaha. Ua uamangko rikgalna chanchiaha. Mairengko rimbite ua tribalangni nokantichi re·ange melana ine okambatokaha. Tarik dona gitan pilakan sokbatokaha. Surojit an·tangni tarigipa gitko pilakna skichengaha. Gitara indakechim -

**Mikrakbo Garó, Rabha, Koch, Hajongrang
Garó Paharo dongenggipa Banai, Kacharirang;
An·chingni dongram a·song Garó Paharko
Gipinrang ra·sekna jotton ka·engahane uko.
Gipin jatrangsa an·ching a·songo gapbaengjok
Bading chiwalanikoba uamangan ra·sektokengjok;
Asongtangan uamang an·chingko nokkol ong·ate
Brangna nanggnok an·ching a·songtangan
ja·mande.**

**Chakatbo, mikrakbo a·songni tribal jongadarang
Krimkro ja·ku de·bo ku·cholsan na·simang;
Bobilrangni an·chingko jakra jakasi wilwilao
Togan gita warachaksona an·chingba ka·tongo.
Pilakan inchrotokbo Garó Pahar an·chingni
An·chi on·gen atchiramna dongja kenani.**

Gitko ring-ani ja-man Surojit pilakna indake aganprakna abachengaha - "Angni ka-sara ma-gipa-pagipa, jongada aro noabirang, da-o an-chingni a-songo, an-chingni wilwilao gipin jatrangsa gapbaengjok. Na-simangni bari bagano gipinrang drae re-bae asongengaha aro na-simangko nokgri jamgri ong-ate brangatengaha. Na-simang da-ororo nikna man-nenga je banoni a-gital manderang an-ching a-songo re-bae dongtokengaha, indake re-bae songdongachaaeako champengna man-jaode; an-chingni Garo Pahar mikkangchide tribalrangni ong-gija gipin jatrangnisa ong-aignok. Chengo Musalman rajarangni Indiani gamjinna mikboke India napdraa gita an-chingni Garo Paharni a-ningni gamjinna aro ong-telaigipani nitoana Garo Paharni rikamjoljol Octopus (sagalni ja-a ge-chetrang donggipa na-tok ma-sa) gita wilwilbae minokbaenga gita ong-baengaha. Uni gimin an-ching Garo Paharni Garo, Rabha, Koch, Hajong, Banai aro Kacharirang pilakan nangrime an-ching apsan ma-ambini on-bagipa jongadarang ba tribalrang ong-a ine chanchie ku-cholsan krimkro songdongachabaenga ia Garo Paharni ku-rio. Ia atchiram a-songko bobilrang chadrapeode saoba jrip chakchike dongna man-naigenma? Maming saloba man-jawa. Uni gimin atchiram a-songko bobilni jakoniko jokatna Togan Nengminza, Phukan Sangma, Maniram Dewan, Bhagat Singh, Kshudiram, Subhas Chandra Bose- manggita dakgipa ka-donggipa manderang atchina nanggen. A-songtangna an-chi on-a nanggen. Jeba ong-bo, an-ching da-ode an-chi pari naaniko dakchenggija, skanggipa an-ching "*strike*" ka-na nanggen aro 'strike' ka-achin an-ching mikron gnangeba mikgrigipa aro nachil dongeba knachakgijagipa aro ku-sik dongeba sing-e am-e nina sikgijagipa dal-gipa, man-e cha-gipa manderangko "*attract*" ka-na man-gen. Uamang

sing-na nanggen an·ching mai nangnikana “strike” ka·engachim. Unosa an·ching an·chingni duk aro ka·tongni kattako uamangna knaatna ba aganna man·gen. Darangba knachakjaode an·ching dingtang gadangni kamko ka-na chanchina nanggen. Uamang “strike” ka·ani sal tarikko tik ka·aha.

Uchi Ukil Gulsan Aziz, Surojit aro Mairengni “strike” ka-na sal tarik tik ka·e donako ma·sie uni walon gondogol ka-na budi dakaha. Ua uni tribalangni a·o asongatgipa biapona re·ange ua manderangko an·tangtangni nokko wa·al so·china ge·etaha. Ukilni chanchianiara Surojit aro Mairengmangni ‘strike’ ka·aniko gondogol ong·atnasachim aro ua gondogolo pangchake Surojit aro mairengko pattoko chipatna skani uni gisiko ua ka·kimchaaha. Ua ‘strike’ ka-na a·bachengani wal baro bajimango ua manderangko an·tangtangni nokko so·na ge·etaha. Dikdiksani gisepon wa·al dillau dillau dake nokrangko kamna a·bachengaha. Wa·alko kimitgipa darangba dongjachim. Pilakkon kamtokaha. Mitam manderangde siaba siaha aro mitamrangde nokgri jamgri, cha·a· ringga gri dake dongtokna nangaha. Mitamrangde biapko wate kattokaha. Nikode darangnian mikrono mikchi ong·pilaigenchim. Bang·batan sawa maidake wa·al kamataha uko ma·sina man·jaha. Manderangni duk bilongaha.

Indake ong·anirangko salgnirangni ja·mansa Choudhury kobor man·e bilongen suk ong·jaha. Sawa indake dakjok ba dakdiljok Choudhuryde mamingko ma·sijaha. Ua chanchisokjaha. Maina, Changsanmangde da·oba jailon dongkuenga. Indide ia sani kam ong·na nanga? Uni indake sing·anirango ua maming aganchakaniko man·jaha. Choudhury ua obosta ong·gipa biapona re·ange nina tik ka·aha. Salgipino ua Aziz

Ukilkoba ua biapona rimangpaaha. Indiba ia wa-al so-anirangko uan dakdilaha ine Choudhurya on-tisaba aganjaha. Choudhury an-tang slaiko ra-e ua biapona gari start ka-angaha. Unon demechiktang Anjaleeba “baba angaba re-pana” ine inaha. Anjaleeba pagipaming gario gaangpaaha. Choudhury gariko taraken watangaha. Uamang miksonggipa biapona sokaha. Ua biap gopram gitasa ong-pilahachim. Nok, jam, bagan, bari, pilakan kame anggal ong-pilaha. Maiba maibarang kame seenganirangko man-engahachim. Mande- ma-su mamingan dongjaha. Unon gitik gitak adita riticha A-chikrang aro gipin bakrimpagipa tribalrang re-bae uamangko changduulaha. A-chikrang darangni kattarangko knachakjaha. “*Chingni Changsan bao*” inarian mitamrangde *ka chalang ! ka chalang* ine rabbitokaiaha. Choudhury A-chikrangni “Ka Chalang” ingipa kattako knarian ua gisiko bilonge kenaha, maina, “Ka Chalang” injokode A-chikrang mamingkon manijaha ine ua iana skangan u-iaha ba ‘*experienced*’ ong-aha. Choudhury kenchake jako slai ra-e ‘gogen’ ine ka-mikenataha, indiba A-chikrang batesa ding-doe jako mil-am sepi ra-e chaangsrangaha. Choudhury maming jokani cholko nikjae slaichi goataiaha. Sakgittamrang a-damon gitilgopaha aro unon siaiaha. Uni ja-man, bilding bildang chadrapange uamangko jebaisi dokna a-bachengaha. Indita somoi uamang Surojit aro Mairengni ge-etakosan sengengachim, indiba obostaan uamangko sengnapatjaha. Sakgittam siana agreba, baditaba sakrangde guli nange jokom ong-tokaha. Ka-onange ka-kimchae tribalrang/ uamang Choudhurya mikron rongsako otklongaha aro ja-a samsako bnekpiledoktongaha. Aziz Ukilni jakrani jakkoba sotonge galsrangaha aro ja-a samsako bilonge dokpnekaha. Anjaleekoba mitamrang go-olrangchi doke, natengrango satkape sibokataha. Aditani ja-mansa ua biapo Sujojtit aro

Maireng sokbaaha. Uamang Choudhury aro Azizni obostako nike duk man-aha. Choudhury aro Aziz bimang gimik an-chi chripchrip dake a-on ga-ake mamingko ma-sijae siboke dongengachim. Surojit aro Maireng an-tang mikkangtangko ba-rachi katipe, Choudhury aro Azizko hospitalona ra-angaha. Indiba Anjaleeko ua biapo nikjae uamang aiao inmanaha aro jajrengaha. Anjaleekode sakgittammang manderang de-tome bachinaba ra-e katangachim. Surojit aro Mairengba, Choudhury aro Azizko hospitalni barandao srik donarian an-tangtangde tarake re-angaiaha. Maina, uamang an-tangtangko ma-sirikna kenachim.

Indake a-songo golmal ong-mitingon ba ua somoion Changsan aro uni gipin ripengrangba jailoni jokbaaha. Jailoni jokarian Changsan Mairengmangchi uni nokonasa re-angengachim. Ua buringrara rama gitasa Mairengko uni nokona sandiangengachim. Unon Changsan burin diltuani jatchio saoba me-chikni chrikengani ku-rangko knana man-aha. Ua chadengdipe knatimchengaha. Uni ja-man chrikqipachipak re-ange ua uno chona nok te-sako nikaha. Unon ua ga-chokchime re-ange ua nokni bera a-kol gita srik srik niataha aro sakgni me-asarang saksa me-chikko joborjosti ba drana am-engako nikna man-aha. Ua me-chik an-tangko jokatna chrikengachim. Changsan uko nike chakchikna man-jaha. Rang-san ua jako gol-dik ra-angpagipachi ua nokni berako rake dokataha aro “ong-kat sala achakrang” ine chrikataha. Changsanni ku-rangko knarian ua me-asa sakgni nokoni tarake ong-kate kene katangaha. Uamang an-tangtangko ma-siriknaba chol on-jaha. Changsan a-palo chadenge dongarian “nokningo sawa donga ong-katbabo” inataha.

Ua me-chik a-palona ong-katbaaha aro Changsanni

ja·ako rim·e “*angko dakchakpabo*” ine grapaha. Changsan jaksamgnichi rim·e ua me·chikko salchaaha aro “*na·ara sawa*” ine sing·aha. Me·chik chadengaha. Changsanni mikron baksa nitatgrika gita ong·aha ua me·chikni. Changsan aiao inmane jagoka gita indake inaha -

: O ! Anjalee, na·asa ? Na·a iano maidake re·bajok?”

Anjaleeba Changsanko nike namen aiao inmanaha. Ua mamingko aganchakna man·jae indakesan inaiaha -

: Angni rasong kopal.

Bang·a katta agangija Changsan Anjaleeko indake mong·aha, maina, ua buringoni tarake ong·katna ska, una agreba attamengahachim-

: Hai ianoni tarake re·galgalgnok Anju.

: Bachina? Anjalee sing·aha.

: Angni nokona..... naljoka biapona.

: Indiba

: Mai indiba?

Janggitangmitingo mande jeko guale dakmanaha uko saoba bikpilatna man·genma?

: Jerang gualako dakronga uarang namakoba dakna man·a. Guala aro namako dakanian mandeni bewal; namgipako dakgipa namgijakoba dakna man·a.

: Indiba na·a angko kema ka·jokma? Anjalee sing·aha.

: Ka·onangachi maibako onia dakmanoba uko kema ka·ani Changsanni ka·tongo bil donga. Anga mandena ka·saa. Saoba angko ma·sisrete angna maiba

oniako dakoba anga ramram ka-onangja.

: Na·a mande ong-na kraja Sagre gitachacha nang-ni ka-tong rongtala. Da-asalsa anga nang-ko ning-tue ma-sina man-aha. Indita sal nang-ko ma-sisretarang da-al ang' ka-tongoni gimaangaha. Angni ka-tongni salamko nang-na on-eng, ra-chakbo, ine Anjalee Changsanni ja·a samgniko rim-eaha.

: Che ! che : Ia nang-ni ka-tongo bilgrianikosa na·a mesokenga. Chakatbo. Ku-sikarichi bi-aniko anga namnikja, kamchisa bi-bo. Hai ianoni bakbak re-gnok. Tango bobilrang rikbajokode namjawa. Changsan ua biaponiko tarake rimangaha.

: Noktangona sokbae Changsan Anjaleena au-miksuna chi on-chengaha. Au miksu man-ani ja-man una cha-anikoba on-aha. Changsan Anjaleeko tusie neng-take dongchina agane an-tangde Anjalee pagipamang bano dongenga uko kobor ra-na re-angna tik ka-aha. Anjaleede pagipako aro Aziz Ukilko dokarangkosan gisik ra-eng, indiba uni ja-man mai ong-aha uko mamingkon aganna man-jaha.

Changsani uni ripeng Surojit, Maireng aro Anjalee pagipako walomangba am-angaha.

CHISA

Anjaleeko noktango donange Changsan, Choudhurni koborko ra-na re-angaha. Unon ua knana man-aha je, Choudhury aro uni ripeng Aziz Ukil sakgnian hospitalosa dongenga. Uamangko saobarangsa bilonge doke, an-chi pari naate hospitalni barandao donangaiaha. Nurse saksasa uamangko barandaoniko nike doctorna kobor on-eaha aro uni ja-man uamangko sanna bondobost ka-aha. Pagipani koborko man-e Anjaleena Changsan aganeaha. Uni ja-man ua nok- jamrangko so-a man-e bilding dildang dake katenggiparangko nike gisiko bilongen duk man-aha aro ka-sachakaha. Uamangko Changsan katjachina beng-aha aro uamangko rakkipilna jotton ka-aha. Bang-batakon ua re-bapilchina mol-molaha. Gitikgitak ua Matbor Sahebali Sheikko aro uni dolni manderangko grongaha. Changsanko nikarian pilakan grapaha.

Mandeni indake nok- jamrangko gimaate, buringo, ramarango chaktogija duk ong-arangko nike Changsan bilongen suk ong-jaha. Iamang da-o bachi re-anggen? Iamangni skia- pora dongja, ramram game cha-giparangsang ong-a. Indiba, iamangko skia- pora man-giparang, buditangko badinge janggitanggiparang iamangko slaini guli gitasa jakkalronga. Indake skia- pora donggijagipa kangal manderangko guli gitasa Politics- ni 'bonduk' ba slai ning-o sike budi gnanggipa ba skia- pora

man-giparang uamangni sikar ka-anio ba miksonganirango jakkalronga. Iamangde 'chess'-ni paun ba guti gitasa ong-a aro skia man-giparang uko kal-giparang ong-a. Chessni paun ba gutiko kal-giparang an-tangni sika gita iachi uachi de-ata gita, skia pora donggijagipa kangalrangkode skia-pora donggiparang ba man-e cha-giparang indaken jakkalronga. A-songni Politics-o kangalrangko aro skia pora grigiparangkon je kamoba ostro gita jakkalronga. Iamang an-tangtang dakgrike sienga, indiba amani amgijanide kal-giparangni ba Politician-rangnisa ong-a. Indaka kattarangko ma-sigipa manderang maming saloba dakgrikjawachim. Jerangan mandena ka-saa uamang mandena ka-sagijagipa kamna mitchichongmota. "Na-simang re-angnabe. Anga na-simangna biap on-gen "ine Changsan aganaha.

Katanggipa Banggalrangko Changsan rimbapilenga ine knae Surojit aro Mairengde ka-onangengachim. Uamang sakgni Changsanko am-angaha. Changsanko gronge uamang salam ka-grikaha. Ruuta salni ja-man gronggrike uamang namen kusi ong-aha. Surojit aro Mairengni, ua Banggalrangko rikgalani ja-tingo uamang sakgnian ong-a ine aganani ja-man, Changsan indaka kamkode ka-na nangjachim ine duk ong-e aganaha. Mande jatna ka-saaniko chanchiode iarang bilongen chaktogijani ong-a.

: A-songna ka-saaniko chanchiode gipin jatko rikgalanio maming gualani dongja ba ong-ja. A-songtangna ka-sagipa sakantian, indake dakaniko namniknan nanggen. Surojit aganchakaha.

: A-songtangna ka-saana bate mande jatna ka-saanian namen chugipa gadangni ong-a. "*Humanitarian is greater than Patriotism*". A-songtangna ka-saani aro mande jatna ka-saaniara Salgi aro a-sak gitan

dingtangrika. Nang-gita dakgipa mandeko ma-siatna angobil dongja. Indiba angni chone ma-siachi anga 'aganenga je mandeko duk saknaa on-e rikgalaniko dontongan nambatgen.

: Iamangko rikgalaniko dontongode, an-chingni a-songtangni jongada aro chatchi bakdilirangan brangna nanggnok, a-ako gipinrangsa man-aignok.

: Kakketko aganode Surojit, gipin jatko rikgalna am-ode indide ua skia- pora man-giparangko aro budichi chalaki dake togigiparangkosa rikgalbo, game cha-gipa, kangalrangko ong-ja. Iamangde danang rasong grigiparangsa ong-a. Iamangnide maming dos dongja. Skia man-giparangsa iamangkode jontroko gita jakkalenga.

: Uamang an-ching gita an-chingming nangrime janggitangna man-genma? Surojit sing-taiaha.

: Na-ara maidake man-enga? Na-aba tribal ong-jaba, indiba tribalrangni dukko nike an-tang janggiko on-kangenga. Na-a ianon atchigipa ong-a. Garo Paharan nang-ni Atchiram song ong-a aro ian nang-ni '*Mother Land*'. Garo Paharo atchigipa aro songdongenggipa pilak Garo, Rabha Koch aro gipinrang pilakan an-chingni jongada, noabirang ong-a. Indiba Choudhury aro Aziz Ukil gita man-e cha-gipa, skia man-gipa manderang jean Garo Paharko mangkimaate "*Greater Karai Bari State*"-ko tarina jumang nikengachim, uamangsa Garo Paharni sontole janggitangenggipa manderangni bobil chong-mot ong-a. Uamangko a-songni mande kema ka-na kraja. Changsan inaha.

: Nang-ni agana ong-ade ong-a, indiba Rome-ni historyko porae nikujama? Kangal aro game cha-giparangna ka-sachake mai obosta ong-achim, uko u-ijama? Tiberius Grekkas aro Keas Grekkas mingggipa

adasa sakgnian Rome a-songni "*Consul*" ong-e, man-e cha-gipa aro skia man-giparangni bobil ong-e chadenge, kangal aro game cha-giparangna chake kam ka-engon, uamang sakprakkon, uamang adasakon, man-e cha-gipa, skia pora man-giparang budichi chalaki dake (conspiracy) so-ote galtokachim, uarangko gisik ra-jama? Man-e cha-giparang baksa bobil dakode amana bate amgijanisa sokbanaba donga. Surojit inaha.

: Amjanaba donga---- indiba game cha-giparangna chake anga sinaba kenja. Jeba ong-bo, nang-gita dake an-tangko tribalrangna on-kange kam ka-gipako anga janggitanga gimik gualjawa, Surojit. Angni janggitangao anga an-tangko rasong gnanggipa ine chanchina man-a, maina, anga nang-gita dakgipa kakket ripengko man-aha. Kangal cholgrigipa ong-oba anga namen rasong gnanggipa ong-a.

Uamang sakgnian Choudhuryko grongna re-anggen ine tik ka-aha.

CHIGNI

Choudhury aro Aziz Ukil hospitalo sanne namde namkalaha, indiba janggitanga gimiknan uamang ja-kora jakkora ong-tokaha. Choudhury ni mikron rongsa ja-a samsa dongjaha. Aziz Ukil niba jaksamsa aro ja-a samsa namjaha. Uamangko indake saknaa on-ani ja-tingo Surojitni kaman ong-na nanga ine uamang sakgni chanchichipe ra-aha. Uni gisepon, Changsan, Hogra, Upen, aro gipinrangba jailoni jokbaaha ine uamang knana man-aha. Uamang uamangni skangni a-arangon re-bae dongengaha aro gamtaiengaha ineba knaaha. Choudhury ka-onange indake inaha -

: Anga ua denggu aro bodmas Changsanko slaichi goe galnasa skengjok. Anga adita namkalkuna, uko anga watchongmotjawa. Uko so-ote galjaode anga tangagimik suk ong-jawaha.

Choudhury an-tangni duk saknaako gualaba demechikgipa Anjaleeni gimin gisiko sukjaha. Ua sijokma, tangkuengama mamingkon uni gimin u-ina man-jaha. Demechiktangna chanchie aro duk ong-e mikchi jingjang jingjang dake dongengachim. Saksa kamkam demechikni maming koborko man-jae ua pagla gita ong-pilengaha. Ua an-tangni gariko aro bondukkode saobarang ra-bae donangani gimin nikna man-aha indiba demechiktang Anjaleekode nikna man-jaha. Nokonaba kobor ra-e niaha,

nokoba dongjana. Ua tusioba mikgil mitapsachinin Anjalee..... Anjalee..... ine okamna aro a-bokbana a-bachengaha. Mamingkon ua cha-ja- ringjaengaha. Demechiktangko nikjae ua pagla gitan ong-pilengaha.

Indakmiting somoion demechiktang Anjalee aro Jiten hospitalona sokbaaha. Pagipani obostako nikarian Anjalee katanggalgale pagipako gipake grapbeaha. “Baba, baba anga re-baaha” ineaha. Coudhury Anjaleeko niksoe grapaha aro “na-a re-baaha ai” ine demechiktangni skoko an-tang ka-bakona salbaaha. Anjalee bano dongachim, banoni da-o re-baaha, mai ong-achim uarango rikkit dangkit pagipa sing-soaha. Saksa toromigipa mandesa uko rimangachim aro uni nokonisa da-o ua re-baenga ine Anjalee Changsanni kattakode pagipana aganjaha. Anjalee baksa Jitenko niksoe Choudhury namen kusi ong-aha. Jitenba Changsanni nokoni srik katbaaha ine tol-e Anjaleeni skia gitan aganaiaha.

Pagipa, demechikgipa aro chakkol baksa indake nangrimtaianiko jumang gitasa daknik man-pilaha. Uni gisepon Anjalee doctor baksa agangrike pagipako aro Aziz Ukilko noktangtangona rimbana tik ka-aha. Sakgnikon gario gatbaaha Anjalee aro Aziz Ukilkode ramao uamangni nokon donbaaha. Uamangni obosta ong-anirang badiaba golporango poraiman-a gitan ong-angpilaha.

Nokona re-baeba Anjalee gisiko bilongen dongsiksakeaha. Ua nokoni bosturango skang gita apsan ong-nikjaha. Anjaleeni chanchian’ salgisako bilongen balmikka rakengaha. Changsanni mikkang bimang uni kattongo noksa salgimin gita ong-e dongengaha- uko ua kimite galna man-jawaha. Indiba, uni aro Changsanni jatchio namen chubea dewali ong-e dongenga- uni pagipa. Una agreba uara non- tribal aro Changsanara

tribal. Indita champengani aro dingtanggrikaniko ga-bate ua an-tangni ka-tongo am-enggipa mandeko man-na amgenma? Ua indaka rokomari kattarangko chanchie bilongen ong-siengaha, indiba darangnaba mamingko aganjaha. An-tangko ua Changsannan on-kangaha gisikode.

Indake adita salrang batangaha. Uni gisepon Aziz Ukil baksa maibarangko ku-monggrike Choudhury, Changsan aro Surojitko noktangona okamatna chanchiaha. Ua Chanchiengachim, Changsan maming saloba uamangni nokona re-bajawaha. Indiba Changsan aro Surojit salsao Choudhury ni okamatna skangan uamangni nokona re-baaha. Changsan aro Surojitko niksoe Choudhury ramaona ong-katange nokningona rimange asongataha aro uamangkon okamatna gisikode chanchiengachim ine aganaha. Changsan aro Surojit sambagrik asongaha. Choudhury uamangming mikkanggrike asonge ka-sine katta bikotna a-bachengaha. Ua chosima gisimko ganachim. Ua indake inaha -

: Nang baksa angni bang-a kattarangko aganani donga, Changsan. Atcha, na-a da-ororo mai kamko ka-enga? Choudhury Changsanko sing-aha.

: Anga "Ku-cholsan Association"-ni skulo skigipa ong-enga.

: Dormohara badita man-enga?

: Dormoha dongja. Paisa pelsaba man-ja. Changsan ka-dinge aganchakaha.

: Dormoha gri chakkori ka-enga? Na-a chakkori nangode maina angna aganja? Anga nang-na nama chakkoriko on-na man-genchim. Da-omangba na-a "Ku-cholsan Association"-ni kamko watbo. Uamang mamingko u-igijagipa kangalrang baksa dongpae nanggita

saksa skia man·gipa panteko nosto ong·aniko anga nie dongaina man·ja. Uamang denggugipa aro bodmasrang ong·a. Nang·ko dilgipa dake uamang baksa dongpaate, nang·ni life- ko nosto ka·na am·enga. Na·a uanoni ong·katbabo, anga nang·na nama chakkoriko jugal ka·e on·gen. Choudhury aganaha.

: Anga da·o namgija chakkorikode ka·jaengaba. Skia man·gijagiparangna skiani, ia maming namgija chakkori ong·ja, bate nambatsranggipa chakkori ina man·a.

: Dormoha gri chakkori ka·ode sawa nang·na cha·a ringaniko on·engjok?

: Indita sal sawa angna on·achim? Na·a angni gimin mamingko chanchina nangja. Anga darangni angna sko saaniko nangnikja.

: Nang·ko anga nang·ni namgninasa aganengaba, Changsan. Na·a ma·gri pagri bi·sa, nang·ko indake nosto ong·aniko anga nikna sikja. Indiba na·a an·tangan indaka signini ramako re·na skode uno angni mamingko aganani dongja.

: Indide chinga da·o re·gnok. Changsan inaha.

: Da·mo. Indinari na·a re·angna man·jawa. Nang·ni onia ka·arangko indita sal chakchikjawaha. Na·a angni 'patta' a·o maina 'Ku·cholsan Association'-ko kuliaha? Angni ku·atako man·gija angni a·o maina skulko kuliaha? Na·a iarangko pe·na nanggen.

: Jinmani skulko pe·ani angni mai bil donga?

: Mai ka·dongachi ia skulko rikaha na·a?

: Anga saksan maidake rikna amgen, indiba jinmani skachide jeba ong·na amaia.

: Nang-ni budichisa iarang ong-aha. Da-o na-a iako pe-na nanggen. Na-a jegita rikdilaha ua gitan pe-naba nanggen.

: Anga skulko rikdilnaba donga; indiba iako pe-ani angni bil dongja. Jinmana jeko dakaha, uko maming saloba saksan pe-na bil dongja. Ain gita kam ka-ani bil donga; indiba ainko pe-ani darangniba bil dongja, iako na-a ku-rachakengama ku-rachakjaenga?

: Gipinni a-o mandernagko asongate skul kulianide nang-o bil dongama? Na-a on-tisa onia ong-aha ine chanchijaengama?

: Gipinni a-a ? Iara na-a maiko inenga? Ambi atchumang ia a-on siangpil-jok, angaba ia a-on atchie dal-pilaha; iara gipinni a-ama ?

: Indide na-a ia a-ako sani ine chanchienga da-o?

: Je manderang ia a-o chasong chasong dongaha, dongbaengaha uamangnin a-a ong-chongmota, ong-na nangchongmota. Na-a ia u-igija manderangni a-ako togie sriksrik 'patta' dakmane nang-ni ine chanchinabe. Lekkaosan nang-ni a-a ong-naba donga; indiba ia a-arangni kosako nang-ni maming '*possessory right*' dongja. Ia u-igija kangal game cha-giparang ia a-on da-oba dongkuenga, ia a-arangkon gamkuenga, ia manderangnisa da-oba '*possessory right*' donga. Uni gimin iamangnin a-a aro iamangnin ong-na nanggen.

Choudhury aro Changsanni jekgrikarangko Surojit aro Anjaleeba jrip jrip knatime dongengachim. Surojitba maibarangko agana skachim; indiba mamatangko bang-a duk on-a sikjaha. Anjaleeba cha ra-bae donangaha aro Changsanchiko nie ka-dingsmitangaha. Demechiktangni Changsanchiko nie ka-dingsmitangana Choudhury gisikode bilonge ka-onangaha aro aiao inamanaha.

Choudhury jegita aganeba Changsanko nom-atna
man-jae indake inaha -

: Indide na-a skulkoba pe-jawama?

: Angni bil dongosa pe-gen.

: Nang-ni bil donga. Dormoha griarangba uno
skina re-bajawa. Uni gimin na-a uno skianiko watote
skul an-tangan be-aigen. Na-a skianiko wataibo; anga
nang-na nama chakkoriko jugal ka-e on-gen aro chakkori
man-kuja dipet anga nang-na hajalgni dake pocket
korosna on-gen. Aganbo da-ode, na-a kusi ong-ama
ong-ja?

: Kusi ong-srangja. Hajalgni maina, hajal chikking
ong-oba anga angni rasong- mikkimko palna man-jawa.
Anga dongjaode skul cholijawa ine na-a bebera-ode; na-a
ma-sie ra-bo, anga skulko watchongmotjawa.

: Bon-kame anga nang-ko mol-molenga,
Changsank. Na-a angni kattako manibo. Skulko pe-e
galbo. Indinari na-a maina chipu baksa kal-grikenga.
Changsade na-a uni bisiko man-aha. Na-a kal-aktainabeha.
Ia chango chipu suna nangode na-a jokjawaha.

: Ia changode angaba mamingna kenani dongja;
maina montol sningbae an-tangan oja ong-e re-baaha.

: Indide na-a skul nokko pe-jawa?

: Pe-chongmojawa. Nang-ni mai bil donga ukon
jakkalbo.

Changsank rang-san chadenge re-angna dake 'hai
Surojit an-ching re-gnok. Iano dikdiksaba dongani
ong-jaha, inaha. Unon Choudhury Changsanni mikkango
champenga gita chadenge indake inaha -

: Da-mo. Re-angna man-jawa. Skulko watgnok ine
ku-rachakjaode anga nang-ko re-angna on-jawa.

: Angko kae rakkigenma? ine Changsan rake ka-dingaha.

: Oe.

: Na-a gualakosa dakenga, Choudhury. Mandeni bimangko kae maiko man-gen, uni ka-tongko kana man-jaode? Englishrang Gandhijiko chipe done maiko dakna man-achim?

Iachango nang-ni gisikni bilkoba porikka ka-na nanggen. Na-a skul watna nanggen, ong-jaode janggi galna nanggen.

: Songsaro sawa sako maichi so-otna ama Choudhury, Isolni ska dongjaode. Changsan rake ka-dingaha.

: Sawa sako maichi so-otna ama? Nang-ko anga slaichi da-oan gona man-a. Aganbo, na-a angni kattako maniyama manijawa.

: Manijawa aro skulkoba anga pe-na man-jawa.

: Manigijani bite mai ong-gen, u-iama Changsan? Manigijani dormoha 'Sia'. Indita sal na-a angni gisiko duk aro saknaa on-beaha, angni a-ako, chiko aro gamjinrangko nosto ka-aha. Angni be-enkoba na-a jong-mot cha-a gita ong-ataha. Angni rasong mikkim mamingan dongjaha. Nang-ko anga kema ka-na man-jawa. Nang-ko so-otani gimin angni 'Pasi'-ba ong-china, anga mamingko chanchijawa aro duk ong-jawa. Simsake dongsobo.

: Jinmani namgnina kam ka-mitingo angni ia be-en bimang bon-a jimna nangoba anga duk ong-jawa. Anga sina kene, ia a-mangni bimangna ka-sae, miksonggipa ramaoni maming saloba bitinangjawa. Na-a angko so-otna man-a. Indiba gisik rakbo na-aba, angko so-otoba hajal

hajal Changsan atchitaiaigen. Angni an-chinin da-oba hajal hajal A-chikrang angna bate seng-bate atchigen. Nanggita dake man-e cha-giparangni cholgri apgri kangalrangni kosako togianirangko chelchakna aro jokatna atchibaengahane Choudhury, na-aba mikrake dongbo.

Choudhury Changsanni bamgijani kattarangko knae ka-onanga amchakjae tarake nokningona napangaha aro skopangoniko slaiko ra-e bakan ong-katbaaha. Nokningni kuturio Anjalee uamangni jegrikarangko knatime dongengachim. Pagipa slaiko tarake ra-baani gimin Anjaleeba pagipani ki-sang ki-sang ja-rikbaaha. Pagipani slai ning-o guli sikmitingon Anjalee slaiko rim-e “*sako gona am-enga baba?*” ine sing-aha.

: Angni janggini bobilko. Choudhury demechiktangna aganchakaha.

Choudhury aro Anjalee paningsa slaiko sekgrike dongaha. Pagipaming amchakjae Anjalee rang-san Changsanni mikkango re-ange chadengeaha. Taraken Choudhuryini jakoni slai “dam” ine gam-angaiaha. An-chi chrip chrip ong-e Anjalee Changsanni ja-a sambaon gitilgopaha. Changsanba rang-san Anjaleeko a-oniko salchana am-e Anjalee..... Anjalee ine chrikaha.


Anjalee janggi galangna skang Changsanni jakko rim-tate “Changsan, I LOVE YOU, na-a babako kema ka-angbo. Babani onia dakarangko gualbo, IIII I L.....O.....V..... Y....O....U” ine jringrotna mikchipangaha.

Mongsongde Choudhury Changsankosa goatachim, indiba ua guli demechiktangkosa nangeaha. Choudhury mamingkon dakna aro chanchina changjaha. Mai ong-aha ukoba ua name ma-sijaha. Ua jarachangaha, bimang jadasikaha.

Sina skang demechiktangni “Changsan, I love you, na-a babako kema ka-angbo” ingipa kattako knae Choudhury bilongen aiao inmanaha. Slaini Gam-ako knae noksulni mandernag bang-baaha. Choudhuryko Policerang rim-angaha.

Uni ja-man A-chikrang, Changsanko goaha ine ma-sina man-e bilongen ka-onangaha, maming champengako manigija rang-san chadrapange jebaisi Chondhuryni manderangko so-otaha aro Choudhuryni Rajbariko ba rajani nakko so-chepe galrsangaha. Attam simsimahaoba nok kamarangni wa-al agilsak gimik teng-chipa gita daknikman-aha.

Changsan unoba Anjaleeni manggisiko ja-pingo ra-e gipake dongengkuachim.



AUTHORNI GIPIN KI-TAPRANG

1. Parakgija Ka-saa (Novel)
2. Dikreni Gitcam Poto (Novel)
3. Jarambongni Walo (Novel)
4. Do-de Mesaram (Short stories)
5. Ka-tongni Chokchimsa Pul (Poedorang)
6. Ka-sara Salme (Novel)
7. Ku-cholsan (Novel)

Published ka-mangipa Novelrangni
gisepo "DIKRENI GITCAM POTO"
minggipa Novel 2002 hilsina
State Literary Awardko manaba.